

國
朝
文
匯

國朝文匯丁集目錄

卷十八

林

紆字建興號畏庵
福建閩縣人

續司馬文正保身說

金粟詩翁集序

郭蘭石先生增點庵遺集序代

西湖詩序

書杜襲喻繁欽語後

湖之魚

析廉

黜驕

答某公書

答周生書

贈李拔可舍人序

贈伍昭康太守序

五 五 四 四 四 三 三 三 二 二 一 一

送周松孫比部出宰如皋序

六

林迪臣太守孤山補梅記

七

大學堂師範畢業生紀別圖記

七

尊疑譯書圖記

八

畏廬記

八

游棲霞紫雲洞記

九

記雲棲

九

記九溪十八澗

十

記超山梅花

十

游西溪記

十

薛則柯先生傳

十一

謝秋海傳

十一

冷紅生傳

十二

陳猴傳

十二

鄭貞女傳

十三

蕭貞女傳

十三

孟孝子傳

十三

趙聲子小傳

十四

徐景顏傳

十四

僮遂小傳

十五

羅孝子事略

十五

先妣事略

十六

紀西安縣知縣吳公德浦全家被難事

十七

書楊孝子誅仇事

十七

書顏屠之婦

十八

書胡蘆丐

十八

外舅劉公墓誌銘

十九

諸授奉政大夫桐鄉縣知縣侯官方公墓誌銘

十九

諸授資政大夫鹽運使銜梧州府知府長樂高公墓誌銘

二十

諸授光祿大夫二品頂戴升缺後加頭品頂戴署浙江按察使分巡金衢嚴道郭公

墓誌銘

二十二

母弟秉耀權厝銘

二十三

鄭氏女墓誌銘

二十四

鈞壙銘

二十五

告王徽庵文

二十五

祭陳氏姊文

二十六

告周辛仲先生文

二十六

祭宗室壽伯第太史文

二十七

祭故太常袁昶秋先生文

二十八

王楨臣先生哀辭

二十八

李佛客員外哀辭

二十九

亡室劉孺人哀辭

三十

國朝文滙丁集卷十八

續司馬文正保身說

林紓

清議者亡國之哀。吹而小人矢端之鵠。俎上之臠也。夫人非其所甚恨。而鵠之臠之。雖盜跖不為。至挾藩發覆。探索幽隱。小人乃無幸而恣其毒矣。伏莽之盜。手白刃。決人脰。而取其貨者。其初無必殺人之心。一號而救者。屠至。則必殺之。以止救。清議者其善號。而取殺者歟。天下鳴其冤。而宮中不知。臺諫爭其命。而執法不赦。獄哭市莫哀。感行路。而瞠若無覩焉。何所讐而至是也。挾藩而唾其匿。發覆而爪其潰。索幽隱而踐其蛇虺之宅。求逃所噬。不可得矣。彼養鋒而不試。斂智而不發。時有所不利。勢有所不可也。危吾言。張吾氣。盛吾黨。前顛而後踵。既振而復踣。以萬金之軀。市一字之史。無救於國。徒戮其身。此何為者。嗚呼。此李杜之所以亡。郭申之所以存也。夫一往無前。利害不計。似郭申。易而李杜難。善刀而藏。不為苟試。則又郭申難而李杜易。有人夜行。經江村。乘北風而吟。甫出口。羣獒奪門而噪。掇石而投。獒來益衆。夫一人之吟而獒如是。苟聯袂而行。倡和相屬。必有愈怪而愈厲者。况又掇石以投。搦其怒而使之必噬乎。高顧之講學。何罪於崔魏陳吳之結社。何仇於馬阮。而必髡之鉗之。岸之獄之。殛之醢之。然則處東漢之時。居李杜之位。所以待羣小者。如何而可。曰志

在討賊才不至焉不可才足討賊權不屬焉不可權屬矣而不得其時據其勢尤不可郭申智者故脩然而行而文正者實有鑒於元祐諸公逆知有章蔡之禍作為是說以自警嗚呼吾續是說吾知所以為郭泰與申屠蟠矣

金粟詩龕集序

天下文章之美非有所倖得也必其周歷世事詳覽變故洞窺乎詩書之源遊覽乎著作之庭而後發而為辭乃非委巷者之言淵乎鑠乎始成為至文然其間之幸而存廣而傳又若有鬼神護持於蒙昧必使作者之光氣無所漫滅若珠之不秘於川玉之不匿於璞焉唐之李杜王孟皆屢歷兵燹詩仍流傳人間不能不謂鬼神之無功吾鄉當嘉道間陳韋仁太史為老師大儒持倡閩詩同時張松寥林鄉溪鄭修樓許秋史諸先生造懷指事各出其磊落慨慷之氣一時旗鼓張於東南而南臺翁慈卿先生方以諸生伏處林麓詩名蔚然與諸先生追逐時候官林文忠公李蘭卿觀察咸家居得先生詩命駕訪之茅茨之下一時驚歎二公為能下士而先生亦未嘗以事干二公也先生晚年於詩益遠雖以松寥之豪恣不可一世而先生未嘗自屈先生初師青蓮間出以昌谷之凄豔近世拘於格調與務為澀體者頗引為病然吾鄉歐齋林公詩雄一時於先生則盛加推引先生遺詩手定為金粟如來詩龕集四

卷藏之歐齋。光緒某年歐齋火。先生之稿亦從而燼焉。余太息痛憤於先生之詩之不傳。又以造化之心與詩人乃多所齟齬也。尋晤先生從孫仙孫上舍。亟問先生刻本存否。時魏禎甫芝芳司馬在座。則先生之從子壻亦趣問上舍。上舍始出先生手定全稿。余躍起座間。讀盡卷餘始釋。司馬言與先生有舊恩。請出資刊之。余為校集。自丁酉訖戊戌。竣其間詩次略有顛倒者。以稿出先生手定。不敢僭易。悉仍其舊。嗚乎。先生不仕於朝。而姓名又不出里閭。迺徑寸之稿。幾復不能自存。吾意天阨詩人。既挫其身。當終昌其詩。已而果得諸上舍家。又有禎甫為剞劂。先生之詩其果存矣。而吾不知世之抱幽墜潛。均得有上舍司馬其人否。是又詩人之不易為也。

郭蘭石先生增默庵遺集序

代

詩之有性情境地。猶山水之各擅其勝。滄海曠渺。不能疚其不為瀟湘洞庭也。秦岱雄深。不能疚其不為武夷匡廬也。漢之曹劉。唐之李杜。宋之蘇黃。六子成就。各雄於一代之間。不相沿襲。以成家。即就一代之人言之。亦意境各別。凡侈言宗派。收合徒黨。流極末有不衰者也。身為齊。產屈天下。胥齊。言身為楚。產屈天下。胥楚。言此勢所必不能至者耳。天下人之聰明。安能以我之格律齊一之。格律者。用以範性情之具。非謂格律即性情也。性情境地。近乎建安。既發之詩。不期然其為建安。性情境地近

乎開元大厯既發之詩不期然其為開元大厯若篤者西江則亦無礙其為西江而已時彥務以西江立派欲一時之後生小子咸為蹇澀之音有力者既為之倡而亂頭虯服亦自目為天趣以冒西江矣識者即私病其數味然宗派既立亦強名之為蹇澀吾未見其能歎天下也陳後山之詩猶寒潭瘦竹光景清絕性情稍弗近者即弗能入妄庸者乃極意張大之力闢李杜惟此是宗然則菖蒲之蘊可加乎太罕之上矣閩中文人在嘉道間咸彬彬能詩鮮為枯瘠之語興安郭蘭石先生以書名於時間亦為詩清麗芊綿自適其適於分門別類之說未敢有犯文孫子安明經以集序見屬顧余困於吏事不常為詩尤不欲為蹇澀之音以苦神思特喜先生詩境閒適不因人為質體因本所見書以通之

西湖詩序

東南山水秀媚至杭州西湖而極余甫能讀書即聞長老言所謂杭州西湖者道咸之間海內多事藉寇蹂躪浙中我太傅左文襄公轉戰於金衢嚴之間兩浙以次收復人民亦漸有甯宇二十餘年以來西湖樓觀臺榭亦以次修治於兵火之後寢復其舊光緒壬辰余歸自京師取道滬上舟行二日至杭州留湖上六日全湖之勝已攬其大略因太息錢氏之經營舉全境授之趙宋宋氏子孫因錢氏之舊以立國溺

情於富麗之地。劃淮以守。海泗唐鄧。至不能有。盡淪之於金。為可悲也。方乾道初政。和議再成。河南腹地。易為邊徼。吾讀樓攻媿北行日錄。言中原人民思宋日甚。金人所部簽軍。遇宋師皆不盡力。金人至。輦中土財物。寓於上都。吾思金人之心。固日惠宋氏子孫之不忘中原也。而杭京士大夫。日逍遙於湖山之上。宸遊數出。觴詠相屬。苟獲敵人一日之見縱。若足以畢吾君臣一日經國之事者已。嗚呼。南渡以一百餘郡之事力。乃贍二萬四千餘員之冗官。泛散無統。其不能一力於國家之事。固不宜哉。今宋氏子孫零落。訖無在者。而湖上樓觀臺榭之存。或仍宋氏舊名。以成其勝。余觀其富麗柔媚。若甚宜於裙屐羅綺之游觀。乃當日欲責宋人以復仇盡敵之事。其習而戾其用亦甚矣。余甚感於宋氏之陳迹。每至必皆有詩。積六日得二十首。多悲涼愴楚之音。不序而存之。後之人亦無由知余蓋有感於宋氏而發也。

書杜襲喻繁欽語後

吳人之婦。有綺其衣者。衣數十襲。居時而易之。而特居於盜鄉。盜涎而婦弗覺。猶日炫其華繡於叢莽之下。盜遂殺而取之。盜不足論。而吾甚怪此婦知綺其衣而不知所以置其身。夫使託身於薦紳之家。健者門焉。嚴扃深居。盜惡得取。惟其瀕盜居而復炫其裝。此其所以死耳。天下有才之士。不猶吳婦之綺其衣乎。託非其人。則與盜

鄰盜貪利而嗜殺。故炷能於亂邦。匪有全者。杜襲喻繁欽曰。子若見能不已。非吾徒也。欽卒用其言。以免於劉表之禍。嗚呼。襲可謂善藏矣。欽亦可謂善聽矣。不爾。吾非見其不為吳婦也。

湖之魚

林子喟茗於湖濱之肆。葦柳蔽窗。湖水皆黯碧。若染。小魚百數來會其下。戲嚼豆脯。唾之。羣魚爭喋。然隨喋隨逝。繼而存者三四魚焉。再唾之。墜綴葑草之上。不食矣。始謂魚之逝者皆飽也。尋丈之外。水紋攢動。羣喋他物如故。余方悟釣者之將下鉤。必先投食以引之。魚圖食而並吞鉤。久乃知凡下食者皆將有鉤矣。然則名利之藪。獨無鉤乎。不及其盛下食之時而去之。其能脫鉤而逝者幾何也。

析廉

廉者居官之一事。非能廉遂足盡官也。六計尚廉。漢法吏坐贓者皆不得為吏。鄙意此特用以匡常人。若君子律身。固已廉矣。一日當官。憂君國之憂。不憂其身家之憂。甯靜澹泊。斯名真廉。若夫任氣以右黨。積偏以斷國。督下以諉過。劫上以違權。行固以遂禍。桃敵以市武。賤民以佐慾。屏忠以文昏。其人日怖然自直。其直以為廉。夫公孫宏盧杞之廉。豈復歟。君子不名之廉者。國賊也。賊幸以廉自冒。劫君絕民。覆國惡。

可因其冒廉而寬之。矧若人者。吾又安知其不外糠糲而內梁肉也。貪財為貪。貪。貪勢尤貪。權勢所極。貨由之入。官屬者憚之矣。國人者憚之矣。暮夜之事。即知而諱言之。雖其人盛言贖財而餉之財者。猶將飾之曰義。矧起居酬應。廉不去口。又惡敢不歸之以廉。嗚呼。載金帛而即豺虎。甯舍人而取金帛乎。則亦將謂豺虎為廉乎。然則劫若絕民覆國之廉。直豺虎耳。吾恐無識方以豺虎為廉。故取而析之。

黜驕

盛生驕。驕生閭。閭生決。驕閭之人而護之以決。授之柄者。必無幸矣。安石明古而不明勢。未成而敗。商鞅明勢而不明禍。既成亦敗。安石學遠。商鞅術陋。然肥秦而秦甘其誅。富宋而宋倖其去。驕其學術。顯達於人情也。以王商而違人情。猶莫全其身。矧非王商而欲愚聾天下。悉就吾閭得乎。明者之行決。事後或有所冀。閭者之行決。冀莫矣。富貴者無勳業可也。求勳業以固吾富貴。喜事之小人至矣。匿然者言義必工。淺謀者論事易動。以其術貢之驕閭。猶試火於枯管。沃鹽於溼壤也。國無政而令驕閭者得行其志。吾屬虜矣。

答某公書

伏聞大帥以精卒數千。躡敵於滄尾之礮臺。坡執事所部張李成軍五百。裸袒咆勃。

直犯敵陣。敵大創而退。獲其巨酋。帥方偉公之功。而提督某害公能至用陵訕。卒卒見直於帥。厚加賞接。毗佐營務。至慰至慰。天下勳烈所在。積忌者亦與之終始。非甚。既退。容隱實無以自善其後。執事周閱世事。當能辨之。幕府之要。原以用才為極策。顧文章之士。動多夸誕。如紆之類。是爾。矧紆之所長。又未必足名為文章者。執事竟欲歲糜千金。辟為參佐。竊以執事為過聽。紆年十八。即侍先君於臺灣。童幼不自勉。勉迴念宿過。慙沮萬態。固不足以益執事也。乃欲辟致舊時無識少年。引據戎幕。無論非紆所料。即執事迴念紆童騃之狀。亦必以進紆為過舉矣。老母明年六十。近視紆益驕貴。若乳下之子。每應禮部試。如甚不得已而遣之。請留不可。行復懊悔。深念親意如此。豈忍割棄可戀之口。冒沾尸素之祿。以違遠老母。執事倘為紆憐。必不忍以先君交誼之故。峻却執事。季父在臺。晤及執事。必能致紆誠款。方命之咎。死罪死罪。

答周生書

惠書數借過。乃至引王君薇庵林君述庵事。推僕為古之義士。傳聞失實。此則僕所慚。悚不敢遽受。必宜辨白者也。竊謂五倫中。忽有朋友之一倫。戚非兄弟。分則路人。而古人於憂危喪亡之交。冒死捍衛。願以為過。及僕身被家難。學業不立。朝夜震局。

莫省為計。則存問誘掖。摩勵砥切。均吾友之力。方悟古人置朋友於五倫中。今果大享其利也。薇庵王先生。天性孝友。僕與游處二十餘年。其夫人躬被兄嫂摧殘。先生處之夷然。視兄嫂加篤。僕窺察其意。咸出至誠。因愈加推重。先生亦蓄我如季弟。學問一事。匡獎尤力。先生既死。遺其子女二人。僕私誓將獨任其婚嫁。僥倖不負死友之諾。其子元龍。依僕十年。已入邑庠。頗以詩筆驚其長老。距薇庵死之數歲。林述庵亦被疫死於烏麓道院。僕奔哭弔之。舉族咸以幼子阿狀為託。僕亦如昔之所以處元龍者處之。亦將十年。阿狀入庠。與元龍同。其詩筆雄警。不如元龍之道峭。僕時時告以詩不足為當。求有用之學。造儒者之道。僕之所以為此者。爾時實未計其力之能至與否。即彼二君。審僕貧薄。亦未料僕之為能教養其子也。僕之為教為養。並為元龍娶婦。殆天幸使然。亦二子志趣不忍忘其死父。始至於此。究皆五倫中之常事。僕習知其故。不敢自奇。而足下為僕奇之。何也。且僕尤有懼者。設彼二子驕荒敗德。與僕為難。則僕亦不過太息流涕。委諸氣數而已。此外尚有何術。推之中興勳臣。力造區夏。苟無天人合德。亦未必遽成絕大勳業。故君子任事。能歸功於天。不惟無禍。亦以養德。矧僕纖介之善。尤何足云。足下重我愛我。遂有逾量之譽。故不敢不辨。暑。盛伏維珍衛不備。

贈李拔可舍人序

世變將兆。有識必先憂之者。非其惜死之心。特篤於衆也。同處大陸之上。目覩滔天。泯夏之賊。劫勒君父。殘賤國衆。既無遺噍。而吾亦將不獨完其身與家。顧又無權以與之抗。則發為悲號。以警覺世士。如唐杜甫元結之徒。而唐世敘論勳伐。曾無及此。二公而二公卒能自立於唐世。則其以所鳴號者。固大有益於其國衆也。拔可舍人以年少盛才而處乎今。余以通家之誼。重許其人。固願其以詩為號者哉。時可措其手。退託為詩人者。弱也。處亂世而務去節義。妄冀不可終據之富貴。矧又未嘗必得。則何必以其退託於詩人者為病也耶。舍人詩沈遠方重。悲慨時事。風旨多見。諸言外。吾不敢謂其即繼武於杜甫元結之徒。而亦可謂心乎國家矣。今朝廷外政寄之吳楚。武昌又居天下上流。度其可欣可愕之事。必有足紀以傳後者。吾衰不恆為詩。詩史之望。屬之舍人矣。夫古詩亡。持之以春秋。世史不可必信。吾又不能不望之可信之詩人。舍人其為吾可信之詩耶。其詩果足紀以傳後耶。吾將於其居武昌也卜之。

贈伍昭辰太守序

世士之出民敵而第甲科。為之上者。必詔之曰。堅而操。遂而學。去仕也不遠矣。久之。

榮於時階進於顯密之途。則非循銓資。託引。援。未有逾次超秩。用才地以自進者也。西學既入中國。士之獲資遣而求業於西者。業成而歸。為之上者。又必詔之曰。堅而操。遂而學。去仕也不遠矣。久之。中館伴持節之選。及與彼人爭歲幣。定盟約。則非循銓資。託引。援。未有逾次超秩。用才地以自進者也。嗟夫。嗟夫。太平之常軌。襲之以求祛時屯。此吾友昭辰伍君之恆不遇歟。伍君強濟博辯。於西學匪所不窺。而尤精於律憲交涉之學。初講藝析津。已而伏處江介三年。與朝貴莫相聞知。庚子兵禍發於畿輔。國家再甯。持變法之說者。朝野上下。厥聲洶洶。時甚宜於伍君矣。顧觀伍君方傲裘于子。縱情談謔。窮搜難碑。雀錄之細。靡為談資。殆絕口不言西學焉。夫用甲科以圖仕。雖不能闢進於資格之軌。輟伏而俟之。猶有遇焉。若西學者。固莫利於貴要之耳目矣。而君又託談謔以自隱。然則將聽乎詭譎者。亂西學之真。勅立祖說。為國凶靈。令有位者用為西學之詬病。此又不得謂非伍君之責也。天下惟事非所習。必仰其人而修。與待其人而反苛也。今伍君為學。率整而趣端。整則灼於知。端則勇於振遠。聞侍郎某君將待君以立教於京師。此伍君得暢其所學之時也。矧吾又曠伍君。天下安有曠其人而猶吝其言者耶。故本其所見者。豫進規於伍君。

送周松孫比部出宰如皋序

良醫處一州。使舉州之人無病焉。醫之力莫數也。良宰處一州。使舉州之人無病焉。宰之力足致之矣。州人之需醫人一身也。至乞其不病於良宰。病或在於生產家族之所係。則宰之力視醫為更偉矣。方今民苛上求。國疲鄰幣。徵發之額。大府日亟。亟以督其監司。監司又日亟。亟馬以督其郡縣。且又令之曰。善為之。毋苦吾民。嚴網而求餘其魚。遏源而思通其流。雖良宰有利民之心。而身且莫利。求不病其一州之民。蓋難矣。吾友周松孫以庶常改秋曹。悒悒莫伸其所懷。坐曹十年。始乞一縣南去。去之日。東南又方多事。識者謂民力盡。周君仁者。雖善憫其民。必莫審其所以為地。余慨然曰。周君者。蓋將悉其生平醫人之道而治其民。誠能治民者也。且能使舉州之人無病者也。嚮者陳小真大令。館周氏病。店且死。寒熱日數作。君扁戶為之處方。得善藥。則候火而求度。既入。復為之辨色。而望氣進食。必調其能胃者。不能胃。則勿進。排盪雲翳。導滌穢滯。調合榮衛。積四十三日。大令病可。余察周君無倦容。無矜色。嗟夫。今日東南之民。罄所力以供上求。而徵取煩數。不猶寒熱數作時耶。積威慄骨。急斂灼膚。所被之寒與熱。視店烈也。而為之處方求善藥者。誰歟。即有之。亦甯如周君之處大令。君不忍大令之店。甯忍舉州之人之店。又甯獨無術為之。審其利於下。寬其求於上。使雲翳穢滯。排盪而導滌之。俾榮衛各安其度。若然。則周君之能實善醫。

與宰之能矣。如皋大邑。勝國遺老。恆用以號召天下名士。流風餘韻。猶有存者。周君有善治。且必有歌詩以紀頌之。余今將傾耳求聽頌周君者之歌詩矣。

林迪臣太守孤山補梅記

孤山實居西湖之陰。東南面葛嶺。水縈之若帶焉。余嘗放舟入錦帶橋。周孤山以出。西冷萬樹積綠。隱隱見微逕。雖斜日掩映。恆蒼然若滴。蓋嵐氣蒸變而成。為此狀也。余三至杭。謁處士公墓。無慮百數。而有典史公為之配。自以為孤山之勝。惟吾林氏得以專之。今守杭者為同郡迪臣先生。又吾林氏者也。先生治杭得其政。養士得其教。為匹夫匹婦存其利。而先生猶以為曠職而亡功。居則煇然若思。廢然若忘。而特喜吾處士公能逃名盛世。不以吏職自污。因補梅百株於孤山之麓。既而歎曰。今日豈吾游觀之時哉。顧吾處士隱於是。而吾又宦茲土。蔣梅適以修家之故事。若數年之後。樵蘇及之。彼杭人又烏知有太守梅者。余曰。先生之言。處士之心也。方處士公種梅。蓼鶴結廬於茲山。且不有妻子之累。豈復圖名。而今之稱處士者。若昨日是。故為名而隱。號曰充隱。即為名而官。亦決非能官者也。先生守杭三年。政平人和。而蕭然恆若無與。豈區區垂意於一梅。吾政恐後人之見梅者。轉以思先生之政於無窮也。而先生又焉逃其名。光緒己亥三月。既為圖以歸先生。並為之記。亦所以識吾林

氏之祥也。

大學堂師範畢業生紀別圖記

光緒三十三年正月。京師大學堂師範生五年畢業將告歸。其留者曰新師範生。曰豫備科生。則大戚以為離其羣。約日集行者列廣庭。區新舊為曹。尊行者為客。留者為主。三揖。主人讀頌詞祝客。客亦具答詞報主人。禮成序登廣堂。列學具構。主客分曹而坐。今尚書右丞嶺南李公。浙西張公。北平袁公。湖北錢公。常州汪公。及紆。則位於主客間。若儗价然。堂設高座。主人揖右丞登座為詞。勵勉行者。於是。以次酬答。張公獨謂必以圖紀其事。曰紆可紆。樂吾黨之盛集。雖不工於畫。然亦無敢陳謝。圖成並為之記。曰古者以廣居集羣士。惟漢宋之太學為最盛。漢成帝謂孔子布衣。養徒三千人。於是增弟子員亦三千人。宋元豐二年。令太學士立八十齋。齋容三十人。外舍生二千人。內舍三百人。上舍百人。綜二十四百人。賜緡錢及郡縣田租屋課。命曰學費。其盛為唐明所未有。然而有明社事。如婁東金沙。幾於門左千人。門右千人。眾亦不後於大學。自辛未至辛巳。舉天下文武將吏。朝右士夫。膠庠子弟。就婁東門下者。幾萬餘人。姓名俱載金鑑。人會吊門。然頗務聲氣。事標榜。遂構復社黨藉。而咸非今日所謂大學堂者。大學堂制。蓋類古太學。顧太學以其名。而大學堂所治業。則務其實。立表

示信鐘動學者曹進分科受業。均新舊學。課其殿最。積五年。毋曠毋輟。而皆竟其所業。以去。嗚呼難矣。天下方多事。客我者鱗集吾宇。登堂求噬吾齋。吾國之士。非資忠履義務學。以與之抗撓。勢岌岌且弗保。顧不治新學。徒慎守其門宇。而將以祛客。客將愈求進。而無藝。故國家曰勵士而盛資其學。即欲以所學淑天下。於是立師範之科。今諸君各懷宿學。歸率其鄉與州。所責亦滋重矣。紆不學。辱侍諸君之後。感諸君義能愛其曹。並能以獎育後進為己任。即欲進說於諸君。亦莫審為辭。謹襲昌黎之送石先生者。為諸君祝曰。天下惟有國之人。始伸眉與强者耦。願諸君詔學者念國。毋安其私。又祝曰。覬成非成。惟力之貞。願諸君勿以慧鈍區學子。慎牖其衷。而本之以誠。又祝曰。願郡將連帥。勿梗諸君事。各抒其所蘊。播其州。州之秀民。咸悅豫與先生游。又祝曰。振困起懦。惟相與師。師道獲昌。善類遂多。願諸君扶植樛弱。而同進於道。圖既成。廣不逾二尺。不能加吾文於其上。別具紙書之。諸君各有詩韻文辭。悉入此卷。浙西張公為之序云。

尊疑譯書圖記

夫周秦諸子之為書也。舍揚荀外。其說多與儒者抗撓。當儒書大昌之日。宜諸子之燄燄而弗揚。滯且莫申矣。乃能騰出幽屏。而屢動乎理家之目。則其精神凝固。亦自

有其不可沒滅於世者歟。吾嘗盡取其書讀之。頗有縱論人天之際。或但簡舉其理。若追逐而窮即之。則又未嘗明言其所以然何者。恣一人之神思。獨造於幽渺之域。間有所會。則又莫據以自信。因亦無以取信於人。而聰明至此局矣。嗟夫。此蓋不母乎名數諸學。故其窮理也。無程範物也。鮮度。雖其書能自名於一時。卒莫利於後世之尋繹而推窮也。自吾交幾道嚴子。讀其所譯斯賓塞氏之羣學。立巨幹而繁出其眾枝。無待留閒設難。抑客而伸主也。初取獵略。炫奇而市博也。揭弊存理。循物取驗。其歷也有階。其嚮也有的。該涉衆途。窺微取精。必使舉世之人。知所謂羣者之果有學也。羣之有學。必關涉乎萬理萬事。而始獲乎羣學之實驗者也。嗟夫。此而不母諸名數之學。而精其深造之功。又安能綜萬理萬事。而盡得其實驗耶。尊疑老矣。名動乎諸王公相之間。下及海內有志之士。無不識有尊疑者。而又當朝廷勤求新學之時。尊疑宜若盡出其所學。以牖發後進。顧乃柴車野服。往來於京津之間。何其脩然於世耶。夫其所為學羣耳。而人則不能羣於士大夫。何也。余方圖卜居於浙西山。水佳勝之處。尊疑其將以不羣於世者。羣我歟。因為圖以進。至尊疑之為喜為慨。余固不之審也。壬寅八月。林紓記。

不燭而行闇。不侶而處獨。其人恆鬼之畏。然而遇醉與倦者毋畏也。延吭以俟刃。據
鑊以受烹。其人恆死之畏。然而悍賊劇盜毋畏也。天下惟鬼與死常足以怖人。而心
弗存焉。與亡其心者。泣之。恆若無事。然則無畏之非難。深知所畏。而幾於無畏。斯難
矣。深知所畏。而幾於無畏。事不在變。而在常。用不在氣。而在志。持虛枵之氣。矯高厲
之節。時命適稱其人。亦可以權為君子。不幸者。重名在前。美利在後。鄉黨譽之。朋友
信之。終其身無聞過之日矣。夫據非其有。而獲重名美利。鄉黨譽之。朋友信之。復過
不自聞。而竟蹈於敗。天下之可畏者。孰大於此。且天下之所謂君子者。亦可權而為
之者耶。惟無畏過自治之心。矯厲粉飾。匿瑕護垢。冀以終存其名。不論而為偽。亦稀
矣。處常而不虞。曰。清於世俗之論說。初志寢懈。而見奪。於是終身常畏人。終身畏人
之人。亦非吾所謂深知所畏而幾於無畏者爾。余行年四十。檢身制行。不足自立。出
觀鄉黨朋友之間。間有譽而信者。吾亦甚畏其論。而為偽也。因築室於龍潭浩然堂
之側。顏曰畏廬。并記以存之。庶幾能終身畏。或終身不為偽矣。

遊棲霞紫雲洞記

棲霞凡五洞。而紫雲最勝。余以光緒己亥四月。同陳吉士及其二子一弟。泛舟至岳
墳下。道山徑至棲霞禪院止馬。出拜宋輔文侯墓。遂至紫雲洞。洞居僧寮右偏。因石

勢為樓。周以繚垣。約以危欄。據欄下。矚洞然而深。石級需滑。盤散乃可下。自下仰觀。洞壁穹窿斜上。直合石樓。石根下插。幽窈莫竟。投以小石。琅然作聲。如墜深穴。數武以外。微光激射。石隙出漏。天小圓明。如鏡焉。蝙蝠掠人而過。不十步。輒中巖滴。東嚮。有小門。絕黑。俛而始入。壁苔陰滑。若被重錦。漸行漸豁。斗見天光。洞中廓若深堂。寬半畝許。壁勢自地拔起。斜出十餘丈。石角北向。壁紋絲絲象雲縷。有泉穴南壁下。蒼黛積綠。澌然無聲。巖頂雜樹。附根石竅。微風徐振。掩苒搖颺。爽悅心目。怪石駢列。或升或偃。或傾或跂。或銳或博。奇詭萬態。俯仰百狀。坐炊許出洞。飲茶僧寮。余方閉目。凝想其勝。將圖而藏之。而高嘯桐林子忱突至。相見大譁。命侍者更導二君入洞。遂借筆而為之記。

記雲棲

五雲山之太不能窮也。可至者。山西北之雲棲塢耳。戊戌四月十日。同李拔可鄭稚星林晚翠命輿沿江干行。過六和塔。至梵村。右轉入竹徑。道側小碑署曰雲棲。萬竹掃天。中無雜樹。幽閒露微溼。青溼如新過雨。泉聲號號瀉竹根而下。小溪宛延。抱竹南逝。叢葦覆翳。不知其流所極。竹斷處見天如覆盂。不半里風篠作聲。又入幽閒中矣。竹身大可盈握。細葉觸風。仰見碎光搖動者天也。洗心亭面北而構。寒泉前渚如

鏡細藻瀲。迴水底縷縷可數。泉脈西來絕馳墜落其中。如鳴珮環。一徑北趣入蒼碧中。始見雜樹。或篁或杉或梗楠之屬。交植不辨柯葉。惟宏師塔前巨杉四編竹護其根。直上無際。中陰小亭。御碑存焉。更數十武始至寺。

記九溪十八澗

過龍井山數里。溪色澄然迎面。九溪之北流也。溪發源於楊梅塢。余之溯溪則自龍井始。溪流道萬山中。山不峭而整。踵趾錯互。蒼碧莫辨途徑。沿溪取道。東瞥西匿。前若有阻而旋得路。水之未入溪皆號曰澗。澗以十八數。倍於九也。余遇澗即止。過澗之水必有大石亘其流。水石衝激。蒲藻交舞。溪身廣四五尺。淺者沮洳。由草中行。其稍深者。雖萍蒿猶見沙石。其山多茶樹。多楓葉。多松。過小石橋。向理安寺路。石尤詭異。春籜始解。攢動巖頂。如老人晞髮。怪石摺疊。隱起山腹。若櫛若几。若函書狀。即林表望之。潏然帶雲氣。杜鵑作花。點綴山路。巖日翳吐。出山已亭午矣。時光緒己亥三月六日。同遊者連縣吳小村。長樂高鳳岐。錢塘邵伯綱。

記超山梅花

夏容伯同聲嗜古士也。隱於棲溪。即塘。余與陳吉士高嘯桐買舟訪之。約尋梅於超山。由溪上易小舟。循淺瀨至超山之北。沿岸已見梅花里許。連陸至香海樓。觀宋梅。

梅身半枯側立水次古幹詰屈苔蟠其身齒齒作鱗甲年久苔色幻為銅青旁列十餘樹容伯言皆明產也景物淒黯無可紀余索然將返容伯導余過唐玉潛祠下花迺大盛縱橫交糾玉雪一色步武高下沿梅得徑達觀林麓近偃陂陲叢芳積縹彌滿山谷幾四里始出梅窩陰松列隊下聞溪聲余來船已停瀨上矣余以步船人以水沿溪行路盡適相值也是晚仍歸棲溪遲明復以小舟繞出山南花益多於山北野水古木渺瀰滯繫小徑歧出為八九道抵梅而盡至乾元觀觀所謂水洞者潭水清冽怪石怒起水上水附壁而止石狀豁朗陰綠慘淡石脈直接旱洞旱洞居觀右偏三十餘級及洞口深窈沈黑中有風水蕩擊之聲同遊陳寄湖滌寮兄弟蕪管入不竟洞而出潭之右偏鵲海雲洞三大字宋趙清獻筆也尋丁酉軒父子石像已剝落詩碣猶隱隱可讀容伯飯我觀中余舉觴歎息以生平所見梅花咸不如此之多且盛也容伯言冬雪霽後花益奇麗過於西溪然西溪余兩至均失梅候今但作超山梅花記一寄容伯一寄余友陳壽慈於福州壽慈亦嗜梅者也

遊西溪記

西溪之勝水行沿秦亭山十餘里至留下光景始異溪上之山多幽憤而秦亭特高峙為西溪之鎮山溪行數轉猶見秦亭也溪水淒然而清深窄者不能容舟野柳無

如被麗水上。或突起溪心。停篙繫條。船側轉乃過石橋十數。柿葉蒼黃。秋氣灑然。橋門印水。幻圓影如月。舟行八月中矣。交蘆庵絕勝。近庵里許。迴望溪路。為野竹所合。截然如斷。隱隱見水閣飛簷。斜出梅林之表。其下砌石。可八九級。老柳垂條。拂拂水石。如縛帶焉。大石橋北。趣入烏柏中。漸見紅葉。登閣拜厲太鴻栗主。飯於僧房。易小艘。繞出庵後。一色秋林。水淨如拭。西風排竹。人家隱約可辨。溪身漸廣。彌望一白。近渴水矣。渴水一名南漳湖。葦蕩也。蕩析水為九道。蘆花間之。隔蘆望鄰船人。但見半身。帶以下。蘆花也。溪色愈明淨。老檜成行。可萬株。秋山亭亭出其上。盡檜乃趣餘杭道。遂棹船歸。不半里。復見蘆庵。來時導他道。紆歸以捷徑耳。是行訪江村高竹窗故址。舟人莫識。同遊者為林迪臣先生。高嘯桐。陳吉士。父子郭海容及余也。己亥九日。薛則柯先生傳。

先生諱錫極。字則柯。姓薛氏。閩之巨族也。長髯玉立。能顛倒誦七經。獨喜歐陽公文。及杜子美岑嘉州詩。抗直好忤人。人亦稍稍引去。先生遂移家入橫山。擇其夷者。廬而居之。當門老榕二株。枝葉濃黑。先生因樹導徑。為曲折。授徒六七十人。紆與焉。先生字紆。曰微。授紆歐文及杜詩。務於精熟。一日讀檀弓至防墓崩。捧卷大哭。紆愕然。先生曰。若非人子乎。吾哭而若不動。何也。紆曰。微重憐在上。不知所哭。雖然。聞先生哭。

亦滋慙矣。先生歎曰：諒哉微也！自爾視紆益重。其課紆歐文與杜詩亦益急。曰：吾不為制舉文。若熟此可以增廣胸次。且吾嘗見鄉之貢士矣。以時文博科第。對策至不能就一札。設問之。得毋以我為慙耶？家絕食。夏曰：嘗不舉火。紆歸食既度。先生未炊。乃覓得先君穢實米滿中。負之以至。先生大怒。咤曰：微若年十一。竟行竊耶？紆泣曰：先生侵晨授微古文及詩。逾午猶不食。歸而對食。心動。故自以其米來。非竊。諸他氏也。先生曰：他氏益不可矣。吾已得米。且至。無須此。若將歸。當請杖於若母。吾不忍夏楚若矣。紆歸白母。宜人笑曰：女以米餉師。奈何以穢易以巨橐。重益之。別令人賫以往。將大父命。先生乃受。更二年。紆以先生諭。執業於朱韋如師。習制舉文。光緒戊寅。先生已七十一歲。紆母弟耀通客臺灣。先生命伯子某往依之。某病瘵。耀日夕侍之。某愈而耀遂以死。先生來弔。大慟而歸。明年卒。門人林紆曰：先生隱君子也。薛氏之族。成進士者三人。與先生皆輩行。先生顧之。未嘗為動。入山後。於經益遠。旁及諸家集。終身未嘗為文及詩。殆並文及詩而隱之也。及門中特偉紆。而紆四十不偶。豈先生所偉者在讀書制行。不以科名偉耶？嗚呼！其將何以報先生也。

謝秋濤傳

謝秋濤。字秋濤。孤介人也。先世有恆產。施而盡。秋濤始貧。有姑適屏塘莊氏豪族也。

子弟錦綺相耀。秋潯家比一牆。未嘗涉足其廡。見莊氏人。一揖輒去。物餽自莊氏者。亦屏弗御。間以醫自贖。受百錢歸。輾轉終夜。患得藥者無驗。則百錢為妄受。自是絕不為人施治。乃愈困。兄秋坡孝廉時饋以薪米。頻至。則力却之。曰。父母託兄矣。我不肖。不更相累。母病繞牀左右行。日百數十匝。微息輒問。更七八晝夜弗寢。母每病。秋潯恆偃然不復類人也。得鮮若螺蛤之屬。亦必奉母。自不食肉者凡二十一年。亦時為制舉文。短質幽峭。不為時賞。適不赴試。祥符沈侍郎督閩學。始一應之。公薨。秋潯歎曰。不獲賞於公。吾命也。餘人不足貢吾藝矣。盡焚其稿。輟舉業。乙未喪父。三年中。聞人聲輒走匿。丁酉四月。復喪母。二十餘日。哭不輟聲。病遂革。未死之數日。妻子皆餒而病。秋潯自移牀至庖。湔之。次曰。吾罪重。不宜死。寢且吾夫婦子女共一榻。我死無別榻。以卧吾子。死人氣胡可近耶。卒時近五更。妻昏罔已。不省人。幼女略問。呼曰。更定。吾父猶呻也。今胡不聞。詎有變耶。銳起而仆。乃兩手據地。默行以前。至庖。次觸僵足。始顛聲號。火集。秋潯死逾時矣。林紓曰。紓三十年中。六面秋潯而已。然每接秋潯歸。輒自病。其布衣糲食為僭也。秋潯苦節如此。時咸怪笑。紓臨弔。二子出見。均骨立。啜泣嗚呼。紓略知秋潯者耳。猶莫為之所。其恆目以為怪者。尚可冀耶。哀哉。

冷紅生居閩之瓊水。自言系出金陵某氏。顧不詳其族望。家貧而貌寢。且木強多怒。少時見婦人。輒踉蹌隅匿。嘗力拒奔女。嚴關自捍。嗣相見奔者。恆恨之。迨長以文章名於時。讀書蒼霞洲上。洲左右皆妓寮。有莊氏者。色技絕一時。黃緣求見。生卒不許。鄰妓謝氏笑之。偵生他出。潛投珍餽。館僮聚食之。盡。生漠然不聞知。一日羣飲江樓。座客皆謝舊昵。謝亦自以為生既受餌矣。或當有情。逼而見之。生逡巡遁去。客咸駭笑。以為詭僻不可近。生聞而歎曰。吾非反情為仇也。顧吾徧狹善妒。一有所狎。至死不易志。人亦未必能諒之。故甯早自脫也。所居多楓樹。因取楓落吳江。冷詩意。自號曰冷紅生。亦用志其癖也。生好著書。所譯巴黎茶花女遺事。尤淒惋有情。欽嘗自讀而笑曰。吾能狀物態至此。寧謂木強之人。果與情為仇也耶。

陳猴傳

林先生曰。閩人不畜僮而養傭。怒以色則受杖。則叛。蓋難御也。同年高嘯桐獨言其戚王太守貽燕者。畜僮陳猴。累杖見血。而猴終弗去。太守需次淞中。赭寇入淞城。火數作。門閭。太守家僮十數盡逃。猴裹布尋丈。趨太守登城。猴徑下以布授太守。俾縫其家人。未盡。譁言賊至。幼子自城上顛。猴捷進承之以手。少女繼墜。猴張右手再承之。墜女適當其懷。若有神鬼陰綴之者。既免。夫人傷足。呻於路周。猴徑負其子女行。

數百步。置之。還負夫人。蹠蹠往復。日行不能二十里。經十日。猴道病。太守度城賊且出。略傍縣。家人必不免。乃遠巡入近村。村人若善太守者。蓋其中一人盜也。逮治杭州獄時。太守適權杭州。出之。至是。乃具舟脫太守於難。居閩二年。太守卒。猴大慟。數絕。尚書沈文肅公來弔。異之。撫猴將以自隨。猴不可。請護喪歸仙遊。蓋太守與猴均仙遊人也。公乃以書抵其縣官。敘猴義。官餼猴月以十緡。猴役於縣官。仍以所得悉奉其主人。縣官益義之。無役不隨。猴自爾亦稍稍置田築室。且娶婦生子矣。每至太守家。輒隅立屏息。若常奴焉。鄉之士流習猴者。輒與抗禮。曰。是有古義。能事主人之孤。安可憐耶。

鄭貞女傳

鄭貞女。名巽。紫永福人。父理齋。永之老明經也。女許字同邑林勇官。林受虐後母。未及娶而適。逾年明經卒。女遂依祖母以居。祖母病痺且殆。女侍疾三年。祖母逝。女乃厚撫其弟妹。為弟娶於周氏。誕子女五人。周死。女復集其諸子。哺之家。益寡。林母以勇官無耗。勸令改適。女以死誓。舅方孝廉者。愛憐女。欲奪其志。女泣曰。家人方構異議。女正無所為計。得舅以為明於綱常。解從一之義。今亦爾。女尚何望。大哭弗顧。舅退。與弟語。女大聲於房曰。若再言更適者。我必以頸血濺其面。舅聞而適如是五十

餘年眇其一目蓋歎枕江洲目因以毀嘉慶十二年勇官歸女已七十有二矣鄉之長老將集資為花燭勇官不可女遂卒勇官亦於是日死

論曰女不嫁而相鄭氏二世厥功偉矣即死於鄭氏無忝也林勇官始弗善其母繼復蔑視其守義之妻雖生猶死耳然則女之不嫁特自守其義不必為勇官守也嗚呼若勇官者蓋傷心之尤者也

蕭貞女傳

蕭貞女父名芳祖為武弁司書記貞女庶產也芳祖既死女遂與母及弟依嫡兄以居婿曰陳嗣臣聞之縶江人將女而病且死未死之前夕女忽心動涕交於頤明日婿家來報喪母迎門止之女已覺據枕而哭弗食擲者五日母哀貞女即亦不復自食已許其嫁死婿以守乃食顧陳生家貧不時具禮是秋八月比舍火女所居屋垣短火盛聲隆隆然女正襟坐牀屢母兄出火陡折而西牆踰尋丈者皆跨入焚之女室獨完好踰月陳氏感其異舉宗來迎女冠帔登輿至是始下牀也

贊曰王孝廉桂舫自言與女同舍火發時穴牆奉母以避談次手足猶悸動而女嚴如山岳嗚呼家共姬之死吾恨其無天也

孟孝子傳

孟孝子者。不知何時人。同年吳敦溪頤昌以事至連江。經馬溝鄉破廟中。有縣官匾旌孝子者。敘孝子事甚悉。余感其事。且泣。因為錄之。孝子名起。母病肝痛。哀號之聲徹曉。人言舖人肝則愈。孝子計不自盡。安從得肝。然肝進而疾仍弗愈。則我為徒死。亦且不孝。乃卜於父墓。用瓦盃百空擲而卧之。盃完則吉。凡百擲皆完。孝子歸。閉戶以刀割脇。出肝如掌。血亦弗濡。以巨鍼縫其創。熟肝而進之。母愈。於是十年疾乃再發。孝子具盃將復如墓。為神而覺止之。不可。嫂乃入面其姑曰。姑向病。起乃割腹出肝以進。今聞號殆不堪。將復割之矣。母駭且呻曰。起所為如此。老身乃弗一聞。然七十之年。不能以須臾之活易吾子也。一慟而絕。嫂奔告孝子。孝子躍起。創亦遂裂。以死。縣官聞其事。旌之於社。

林紓曰。戕身以死。其痛止於須臾而已。若坐見吾親呻楚號呼。則耳目手足均無所置。寸心之痛。甚於自戕也。孝子之出肝。自分無所得生。必卜而後出者。亦萬一期母之愈耳。至果符所卜。喜悅之氣充週於身。創乃弗劇。迨母病再發。孝子以亡肝之人。震於哀懼。安得不死。天下惟心乎其事者。往往出於過情。母病如何事。乃可以戕身責之耶。人惟患其無心耳。過情而出於正。吾斷不能繩之以儒者之道也。

趙聾子小傳

趙聾子楚人以相術至閩三日閩之薦紳先生大集其門至不可過車馬納金屏息聽決於聾子聾子曰某頤豐壽耆羣客聞之皆自摩其頤也某準隆位相羣客聞之又皆自按其準也神色惴恐惟患聾子之詆己者若者神木而色朽當死則淚承睫他客亦戚然若憫其果死者更撫其項審其頰曰是紋佳可勿患則淚者笑矣壽夭貴賤惟聾子一言聾子詭譎多智嘗陰飾妹麗若貴家者亦至而求相聾子恟叱曰若倡也若何相相者此而栗引去見者大神之士之應舉者應至聾子皆許售閱試得售者百有三人耳聾子許售已百數榜未出至而更欲有問者晨款其扉而聾子以夜去矣

畏廬曰有某公者擁貲巨萬已任方面事聾子甚恭聾子策三年必開府今已後期無驗病擊不復良行公恭儉峻整親故嚴憚無敢陳乞於聾子特厚嗚呼聾子亦神於乞矣

徐景顏傳

徐景顏江南蘇州人早歲習歐西文字肄業水師學堂每曹試必第上上筆琶簫笛之屬一聞輒會其節奏且能以意為新聲治漢書絕熟論漢軍雖純史之家無能析者年二十五以參將副水師提督丁公為兵官壬辰東事萌兆時景顏歸輒對妻弟

泣意不忍其母。母知書明義方。以景顏為怯弱。趣之行。景顏晨起就母寢。拜別持簫入卧內。據枕吹之。初為徵聲。若泣若訴。越炊許。乃斗變為慘厲悲健之音。哀動四鄰。擲簫索劍上馬出城。是歲遂死於大東溝之難。

論曰。余戚林少谷都督。於大東溝之戰。所領兵艦。碎於敵礮。都督浮沈海中。他舟曳長繩援之。都督出半身。推繩就水上。拱揖俾勿援。如是三四。終不就援。以死。又楊雨亭鎮軍。軍覆威海時。以手槍內向齧齧之間。彈發入腦。白漿潰出。鼻竅下垂。徑尺許。端坐不仆。日人驚以為神。二公皆閩人。與景顏均從容就義者也。恆人論說以威海之役。詆全軍無完人。至三公之死節。亦不之數矣。嗚呼忠義之士。又胡以自奮也耶。

僮遂小傳

僮遂者。閩福清之海山人。生而不自知其年。以乙未先太孺人病時來。既而遂佐吾喪。夜及他僮席。慕同余宿。喪次所言多不可曉。余亦不窮悉也。然至忠。見余家連年喪亡。輒夜半哭。亡室劉孺人逝時。遂侵曉起。私市饌餼。滄茗跪進於靈次。拜不止。他僮笑之。遂怒曰。我孝主母。弗類若不孝也。嘗從余客荔城。過縣亭山。與翻遂咎與夫曰。明日更跌當擇其平坦者。勿令碎吾主人輿中物也。其愚如此。遂父老。再歸省之。父送之十里。遂跽曰。父止勿送。至則述其父狀。余詰遂何由知禮。曰。見主人常跽太

夫人遂今乃知父之宜祀也。予賜以棉衣食物及錢。咸厚楮重裹郵致其父。見天大風雨。輒叱曰。遂父適在田西被雨矣。不憚者累日。余來杭城。遂哭將從余。余增其月錢慰止之。得家書。遂乃以今年五月十八日被疫死矣。嗚呼。以遂愚忠。不鑒其天。可以永年。今亦爾乎。吾聞柳州言南方多疫。勞者先死。是必吾家役之無方耳。傳之亦所以志子過也。

羅孝子事略

羅孝子名義進。字子高。閩縣之觀音井人。隆冬一褐。不蔽兩脛。脛凍則綴敗絮於褐下。狀若衮者。案置一盂。糲屑鹽豉雜菜根實其中。一日再哺。咸取以佐飯。父年八十。七。自獲孝子之養。所御恆有新衣。烹飪之事。必出孝子之手。美饌佳餌。孝子恆多方羅致以供其父。孝子所居室。以厚楮榜壁。記進膳晷刻。不差黍黍。父所常御鱸魚。鰕肉之類。備列無漏。父年老。飯益健。孝子侍側。頤動眉肆。若自餐者。父食稍減。孝子退亦弗食。如是三十餘年。同治戊辰。父患目疾。結厚障。西醫將啟以刀。孝子大啼。父卒就西醫館。啟其障。孝子曰。載珍膳。即館哺。父夜復即牀下宿。更盡數起。歷百有五日。疾愈。孝子同懷兄二人均有子。孝子壯時。嘗佐人貿運。受直儲微貲。父將為之娶。孝子語人曰。兩兄所獲。僅庇其孥。我娶。父安得養。我終不以婦人奪父之養也。苟大宗

勿廢祀。我甯爲其不孝者。故孝子終身歸。甲午父目疾復作。孝子策父年高不可更。即西醫。乃五更起。以舌舐父目。既設案。庭心搏顙。籲天。遲明始已。凡二十四閱月。而孝子病。先是孝子有足疾。常患脛痠。至是家人戒孝子勿夜起。以增困。孝子曰。父愈我病。庸何傷。疾幾猶即枕上。禮佛弗輟。乙未某月。孝子卒。年五十有三歲。孝子晚年屏落世事。專以養父爲急。恆於父前作嬌態。父年高亦忘孝子之歲。以爲尚三十許也。嘗曰。吾子三十矣。未娶。奈何。嗚呼。孝子之志事。可謂苦矣。乃前父而死。不竟其養。吾聞其死時。猶喃喃呼其父也。

先妣事略

先妣陳宜人諱蓉。故太學生元培公女。先世於明代爲顯仕。母鄭孺人知書明大義。宜人生於道光己丑年三月念四日。年十八。來歸府君雲溪先生。丁未生大姊。壬子生姪。逾年生二妹。殤。丁巳生高氏妹。庚申生東耀耀生二日。府君客遊臺灣。資盡。困不能歸。歲大祲。澳門賊以銅艇闖入內港。聚江南橋下。謬言與南船競鐵繃。發砲互轟。紆適家橫山。距江三里。飛彈蚩然。日夜從屋上過。比屋奔徙。略盡。宜人以無食。故不得去。先大母方病。大姊稍省人事。健紆不令出擁弟及妹。環宜人而泣。宜人方縫旂撫慰大姊。言抵夜盡三旂。可得錢四百許。明日大父母及爾兄弟當飽食矣。紆時

幼冲不知母言之悲也。是秋府君書歸郵致金三十圓。自是月以為常。越庚午。府君構疾。至家四十日卒。時大父在殯。大母亦繼逝。喪葬接踵。悲梗勢頓。宜人因而大困。耀年已十九。憐紆貧不能養。陰與宜人謀。將東行渡臺。依季父靜庵先生求館以助。紆泣止之。不可。戊寅五月十日。耀乘紆赴試。拜母徑行。紆歸見宜人有淚容。詢之。知耀行矣。越九月。紆方夜侍宜人坐。從弟華從門外號而入。拜宜人。告耀死。宜人以首抵柱。慘戚至不可以狀。炊煙經二日不舉。紆長跼搏額言曰。耀為其兄客死於外。義不敢禮以上殯。請以紆家子後耀。母念耀當益念紆。紆必求其所以慰母者。母今不容更悲矣。十月。紆奔耀喪於臺陽。明年。華始持耀喪以歸。華季父靜庵子也。生而母死。宜人撫之以長。方府君困時。華與高氏妹及耀均數歲。牽衣從宜人。宜人行庖。諸子羣集於庖。啟鼎復集肘下。咸恐後食。然庖得少肉。華恆食其精者。弟妹有妒容。宜人撫之曰。華無母而弗知乎。脫余不幸先而叔母死。叔母之處而華不猶是耶。華始娶何氏卒。宜人為之更娶於高氏。生二子一女。斷乳後咸睡宜人。昵昵作嬌態。宜人待之與諸孫等。壬午。紆領鄉薦。春官報罷。宜人見紆歸。喜甚。竟不及下第事。壬辰。紆復北行。宜人忽夢紆病於析津。遽起開門見月。乃覺其夢。即亦弗寢。日上移榻廊隅。望門待郵者二日。析津書至。無病。而宜人憊矣。高氏妹嘗語紆曰。母憇兄。意殊不

在得官。兄南歸。多以五月。蒼霞之洲。大水新落。家具雜沓。橫亘日影。停窗紙上。母指
摩家人。為兄解裝度書籍。往來笑悅。兄憶之耶。嗚呼。無母之戚。得妹言。愈弗堪矣。宜
人來歸。府君時瘳。已綴喉際。細裁如核。積五十年。卒以不救。先是醫言。創巨血且甚
崩。紆驚悸。號慟不知所為。既而自念。宜人生有隱德。有鄭某者。負債重。將圖死。宜人
命紆出其醢。館其妻子六七人於家。經年。又某某基貧。賴宜人。力均娶婦生子矣。以
此二事。或得請於天乎。已而疾果不見血。醫言卒無驗。嗚呼。宜人之喪。至是逾百日
矣。不孝紆始及其婦劉氏。縛帚汎埽。宜人之宮。帷幔陳設。莫變其故。而茶端藥具。一
一在目。咸足悲涕。迴念願復之恩。當何如矣。天乎痛哉。

紀西安縣知縣吳公德瀟全家被難事

嗚呼。自義和團。紅於畿輔。天下洶洶。爭以黨殺西人為能。一二當路。復養成其毒。藉
以祛除外患。不知吾華虛實。已為所覘。軍無後繼。合列強之力。以拊一國。舉以亂民。
為責言。以理則詘。以勢則劓。禍機至明。而懵懵者。仍用以快一時之意。而吾友筱村
吳公之難作矣。公執理而抗。不徇私請。以阿其上。監司某憾之。次骨。西安積穀。無見
糧。糴穀之款。悉儲之豪右家。公以簿責之。勿令吞蝕。豪右又怨之。有羅楠者。素健訟。
勾結胥役。舞文漁食於其鄉里。公廉得實。峻抵之。於是豪右盡役。咸附羅楠。有都司

周之德者與羅合謀日圖不利於公會江山事起土賊萬人以仇教為名藉之攻剽邑中。西安人咸欲應之。公謂北事未定。洋人必不宜殲。亂民譁動。斥公右。洋人殺公之謀遂決。六月念四日。公至監司署計事。出羅捕合數百人。劫公入告監司。令以通番罪誅之。監司憾公不救。抗言吾力不能遽及。爾自治可爾。羅姓乃縛公於監司轅門。鑄公鬚髯且盡。以利刃攢刺洞腹。死。公罵不絕口。監司立堂外視公死。乃入。是日並殺六洋人。一童子剖腹未殊。施腸劓刎地上。兩時許始絕。公子仲韜馳哭尸下。又殺之。羣賊守縣門。殺公家四十餘口。始定。怯公篋得康有為書。監司大喜。以為通賊情真。誅之有名。嗚呼。康有為嚮在杭州。一老司官耳。遍謁當路。孰不與之款接者。乃用康氏未獲罪以前之書。陷公滅門之禍。然則譚復生六人之獄。何不聞朝廷錄其妻子耶。賊擅殺縣官。而長吏反附被殺者以刑憲國之失政。莫此為極。聞公老母幸存。乳下尚留一穉孫。未知能輾轉至杭州否耶。公性至孝。博極羣書。以不能善事長官。縱容胥役。以及於難。吾無力不能直之於朝。撫其事附之吾書。亦以識亂世良吏之不可為也。哀哉哀哉。

書楊孝子誅仇事

楊孝子凌。閬縣之龍柄鄉人。父某見戕於族人。俊孝子訟之九年。時有鄉居進士某。

左右俊乃不復論。抵會赦得出。孝子號泣思狙殺之。而俊蹻捷善鬪。累嘗不得近。乃以刃自隨。又二年。始遇之族父家。孝子遽以刃進。俊疾格。刃脫腕而飛。俊更拘孝子。創甚。謀俊乃益劇。一夜。傾俊飲於許氏。歸途出狹巷中。孝子被髮焚香。向柩而哭。合從弟四人俱出遮俊。俊被酒。逡巡。蹈孝子伏中。伏發。俊以手格。刃斷指。猶健進。時微雨。滑。逡孝子與俊俱仆。俊伏孝子上。孝子呼曰。衆來。伏吾上者。仇也。但所勿刺。衆交刃之。俊死。孝子無恙。余曰。狹路。權仇。主客皆仆。衆多刃集。能以智自全。仇仍得復神識之。湛。楊子可用以行軍矣。

書顏屠之婦

顏屠之婦。佚其姓。其始倡也。笨醜不能勝歌舞。乃謬為恭儉。以自振。年四十而始從屠。屠食指十數。先娶婦死。已有子女。不母而自相睡。亂髮垢頤。就竈而食。據闌而寢。屠病之。迎婦而昇。以政婦至。且不視屠之子女。履堂見糠屑。它曰糠也。箕拘之。拘牢。積陳飯被水腐矣。曰粒也。漉之。壁三篝燈。命去其二。夜則使其子女捫索牀。寢。浙米於釜。多其瀋而噉之。勿令稠且厚。屠親戚慶弔之事。至不敢聞諸其門。即聞亦不答。歲集。其美示屠曰。此吾力所美者也。屠大嬖之一。惟其言之聽。而屠之兄弟子女親屬益困。相引於暗陬而泣。婦不之聞。屠亦不之顧。婦食已輒寢。狗不得食而狂吠。屠

之子仆其一。其一救之。又仆。家人大集。狗乃去。婦聞聲。聲於房曰。逐狗。勿復吾盜而敗吾幾。則亦竟不出視。非不視其子女。懼將見創而藥。藥重則錢耗也。屠之家有病者。呻者。救者。詛者。寒而慄。飢而啼者。婦目若瞋。耳若聾。而栗栗驚。故深夜略動。輒能覺之。婦私計。衆叛已固。折之則自屈於詞。乃偽盲且聾。握鑰而坐。錢終不出。然時通其外家。實珍饌於囊。開戶瞰之。體日以碩。對屠仍糠覈也。一夜火發。婦既癡肥。又擁錢麗。不即出。遂焚以死。屠與子女皆走免。此曹子于南為余言者。余曰。嗟乎。受人之聘。治其子女。而惟財是靳。至狗喫其子。吝藥而猶不與。則謂其無恩也。必矣。家之有子女。猶國之有百姓。用人者。率皆以吝財為賢。吾恐其相引而泣於陬者多矣。

書葫蘆丐

葫蘆丐不知何名。自呼曰李仙。其衣甚博。且詭行乞於市。恆荷大葫蘆。得錢必就肆飲。既醉。散餘錢於路。令羣兒爭拾之。以為樂笑。丐所至。兒童百十成羣。尾其後。市人苦擾。輒多予錢。趣急去。以故丐所得。恆十倍於常丐。丐甚信而能書。市人操百錢。令丐署券。約經年勿至。丐諾。則終不肯約。每執筆向北叩首者三。大書曰。吾主光緒皇帝。某年乞食臣李仙書。或問以顛頓至此。何由尚念皇帝。丐曰。吾無功。日令百戶之人。供我醉飽。有司不以為罪。此皇帝寬典也。夫今之作色者。取醉飽於一邑。作

郡者取醉飽於一郡。其無功與我埒耳。吾惟無功而恥食於百戶之人。乃愈不忘吾皇帝也。識者曰。丐其有道者也。或曰。丐嘗為吏。憤其上之所為。務取利而無恤民隱。乃詭為此狀。以示譏。二說也。人莫能決。林先生曰。行乞而懷國恩。丐非常人也。然必詆官人者。以為其類。使彼變業為仕宦。且受詔取謫。繼以刑禍。求復於丐。不可得矣。今得逞志於市人。殆蒼蒼者憫其愚而欲全其天年也。世有傷時而得禍者。吾又甚惜其不託丐以自隱也。

外舅劉公墓誌銘

公諱有蒸。字作楫。號修梅。曾祖某。祖某。父某。三世應童子試。至老咸不售。公幼有節概。喜通鑑。尤長於詩。公父為蔡太史以成婚。蔡公父子相繼列詞苑。公自以貧薄罕至其外家。先娶鄭孺人。育二子。均不舉。公大病。鄭孺人貸於蔡公家。既而健僕將千錢至。謂某戚鄰債博進者。憫即病。贈此以易善藥。公曰。吾昏憊不省有此。顧吾病無足憫者。請還錢。仍以償進病。已出。佐某副將戎幕於浙西。某武人不知書。同客者見辱且盡。公計不行。將及遂行。行二日。賊大至。虜某以去。公間道出江山縣。道亂山中。得微徑。銳及其顛。遇邑人阻山以避亂者。見公雅素。為治具。席間多詩人。公即席賦詩五十餘韻。靡其坐人。因為醺。酺取道三衢。遂闔。自爾遂不復出。鄭孺人更產二子。

二女遂以療死乃續娶陳孺人公相婿及余余方從羣兒戲公弗善也越七年余客臺灣父執某申前議公得余上外祖母鄭太孺人書再三讀曰可矣童子戀恩余於書中若聞其哭聲性情哀摯可妻也顧非富貴中人耳余既娶公長女每謁公必大喜舉呻吟語及五種遺規勗余越二年助余膏伙令執業於陳荅園先生之門甲戌余病公夜縫城至余家即卧內撫余喁喁向曉始去余每應童試雖嚴風驟雨必送余至試院五更天陰四顧無人公挾余坐明倫堂廡下論道學源流勉以立身安命之道壬午余領鄉薦公已病症忡見余輒泣嗚呼生平感恩知己至公已極而不能富貴果如公言矣公以光緒某年卒年六十有三歲生四子陽其三又喪其三孫與兩孫女余室亦繼逝今存者子愈霖孫某次女適林伯務亦孀矣愈霖近偏廢余遂以某月某日葬公於某村某山泣而為銘曰

四世儒而莫昌其家廿年事公而不得公之瑕守死行志決幾行智闡幽揚微公婿紓誌

誥授奉政大夫桐鄉縣知縣侯官方公墓誌銘

浙江桐鄉有循吏曰方公諱家澍字雨亭閩之侯官人光緒壬辰進士廷試第一入翰林尋改官兵部以選得桐鄉縣知縣桐鄉再贖於赭寇逾五十年元氣粗復民

仍敦樸無復開敏公至集桐士於桐溪書院試以論策更建白社書院於屠鎮凡去縣遠不能至者皆令就白社學未期年士乃稍稍獵略古籍通曉時事公曰延接其秀異者禮之又恆微服出行郊郭間問民疾苦時方患盜則出資募丁壯徼巡城中盜警以息明年調秀水送者空城邑既到官榜於縣門曰凡負枉欲愬之官長者自署狀至勿緣吏役日再蒞堂皇受而聽之遂清舊牘數百鄰邑父兄爭越境來愬公慰遣之咸涕泣以去秀民多業蠶蠶失飼而疫公立蠶學分館於邑中驗蠶病絲業復畧邑之北門有淫祠一區秀民造詭說謂神能福禍人捐金錢者踵屬於道公率數騎至而平之徹其香火即其地立塘灣學舍課士又創立蒙學苦無資則牒上大府請重稅鴉片以資學議者大譁公弗為動卒行之又明年得檄歸桐鄉北方新用兵西鄰責歲幣急則取之民間吏因緣為奸利公牘其弊上之大府大府稱可頒之七十二州令一一如方侯言秋薦饑盜發近邑而所謂青幫紅幫者為患尤烈公大出資更募丁壯即江上刺取賊蹤已得賊渠公揚言將縛赴會城聽鞠已乃即所劫掠地殲三渠杙其頭曰是賊渠曾刺取吾民者既以法盡之協從敢仍渠所為者得無赦邏偵既密盜舟過桐江輒獲雖遠必招取主者歸其贓公聽斷神老病荏弱者咸令坐聽勿踞處外人有禮表敬定教民亦無敢挾外人持短長一邑稱平公少負

才望既通藉。始講經濟之學。甲午上書。皇帝言遼瀋根本之地。不宜委畝。不報。既改官。遂參依將軍軍於塞外。為將軍籌建鐵路。以西法練健兒。備邊均以財絀。格不行。行者第闢團禁之地。縱民耕耨而已。光緒某年某月某日卒於官。年四十六歲。公與余壬午同年。出長白侍郎寶公門。余好戲言。遇事輒譙責公。公夷然未嘗有忤語。人曰。張弼余部郎。謂我友畏廬者。當忍其峭峻。故遇事益下余。庚子余客杭州。寶某公謂高媿室曰。畏廬困。當以五百金餉。畏廬媿室曰。畏廬方責君嚴餉之。且謂公重汙之矣。公沒。媿室舉以語余。嗚呼。余一鄉處公包容中。乃不之覺。五百金何足言。所難者。累折而不我絕耳。公弟家湜家泌。屢以銘徵。余把筆輒悲不能書。今媿室又亡矣。吾將銘媿室。不能不先銘公。公大父某。父有詩。均以公貴。贈資政大夫。子三。長和。留學美洲。以襄助學務。敘勞得知府。次某。又次某。女三。長適某某。次適某某。次幼未字。公於光緒某年某月某日。已前葬於某山。余今為補其銘曰。

不鈎微而止其奸。不取寵而安其官。振饑而慰寒。豪莫敢趨而謹。胥莫敢面而譟。焦心苦思。外罷內殫。永息於茲。松杉千盤。隱德滋遠。嗣續是觀。

誥授資政大夫監運使銜梧州府知府長樂高公墓誌銘

媿室先生既沒之三月。其母弟外務部左丞而謙生員鳳謙奉事狀徵銘於余。余受

而愴然曰。嗚呼。吾六十之年。本託銘於公。今吾乃轉以銘公耶。顧知公生平最。非得吾銘。世亦莫從而求詳焉。公諱鳳岐。字嘯桐。媿室則其號也。曾祖文祺。知府銜。候選州同。妣吳氏。祖彬。順昌縣學教諭。妣楊氏。父紹曾。同知銜。妣楊氏。程氏。三代均以公兄弟貴。贈光祿大夫。妣皆一品夫人。公先世貫衛輝。唐時有縣尉尉閻之長樂。卒官。遂僑寓為長樂人。州同公好善。信於鄉里。鄉人稱曰高爺爺而不名。乃再世而貧。同知公忠信孝友。曾以身代季弟下獄。程夫人尤知書明大體。內政肅然。公兄弟均程夫人出。至友愛。日依戀膝下。公神采謨毅。匡兩弟必以正。有過未嘗假借。年十二。讀史記平原君傳。至毛遂斥十九人語。公大書其上曰。胡不更忍一時。識者咸知公後且以度勝矣。既長。服膺宋儒尤篤。律躬愈嚴整。間為古文。似劉更生。曾南豐。吾鄉林欽齋先生甚才之。而桐城吳塾甫先生亦稱近世文章。能遏抑光氣者。長樂高君其近之矣。顧乃不時作。以公方屬意經濟之學。壬午領鄉薦。三上春官不售。則去佐林太守。啟於杭州。太守有循聲。公參佐其政。日以舉。庚子太守卒。公就候官。方侯於秀水。兼主浙江大學堂講席。時西林岑公開府嶺南。謨詞具瞻。幣以使者禮公之。廬公遂去浙而粵。桂林寇警。方大猷岑公督師西討。公奔走兵間半年。事平。以浙江知縣保知府。加鹽運使銜。遂權梧州。大亂初。亟伏莽者猶間出。遮略行李。公遺騎追。

逐而前撲之。每得盜宜死。必婉語以致死之由。哀其不教而戮。盜咸首服。公退語家人。謂官吏失職。民饑而行剽。得死固矣。然吾終疑其枉。悲其愚也。州之舉人某。武斷鄉曲。臨質抗辯不屈。公語曰。幸與君同忝賢書。今吾踞堂皇。對簿君。君辱亦吾恥矣。因開陳以義利至再。某感服。訟遂息。公治梧作早晏。息為狀甚劬。或諫公節勞。公曰。縣所不決。始登之郡。吾仍濡而不時理。彼旅郡而待質者殆矣。居梧八月。清義倉立。工廠興。蠶學辦。農林整。學規治。官事如理家政。謂食祿忠事。終不敢以私負國。既謝病去梧。梧民罄戶送之。時岑公亦入長郵傳部。將以尚書右丞處公。公不可。岑公既去位。公屏居海上。既用侍郎于公薦。入考御史。廷試第一。例得記名。忌者構而沮抑之。公夷然出都。旋聞孝欽顯皇后及我德宗景皇帝相繼升遐。公適患作。伏枕大痛。病益增劇。遂于己酉二月十三日卒於滬寧。年五十有二歲。臨終謂弟鳳謙曰。氣機轉。中國有望。意屬憲政也。嗚呼。公生平誠篤。孝弟廉謹。高於儕輩。言端而行果。志願所在。恆欲以忠自效。戊戌入都。適德人犯即墨。聖廟怒者譁起。公獨謂必清內治。始足以遏外侮。合同志詣臺上書。皇帝請下詔罪己。因陳內治外交籌餉練兵四事。都御史大驚。斥去勿進。聞者趨之。公素貧。凡筆墨及祿俸所得。悉以分贖親族。沒之日。蕭然無餘資。配劉淑人。孝謹慈惠。聞於戚鄰。聞子常游學比利時。女君

珣通曉能文章。適騎都尉黃大鈞次君玉。君玠今將以十二月二日歸葬于福州鳳凰池先塋之次。嗚呼公逝。知我者畢矣。余自聞喪至今。儼然如喪其手足。捧事狀。至於不能竟讀。敘公美行。亦莫悉其所止。今第就其大者為之。銘曰。

亦直有言。吏曰民牧。善牧為字。民始見腹。蒼梧渙渙。民罷而怒。守來守來。僵者胥。通。既蕩。魁渠以覆。姦狙莫遂。判不留牒。弗病嚴細。載鳩載淑。舍郡而臺。惟公之忠。格于彊諫。義違同。歸就松篁。洋洋江東。鼎湖再痛。遂及沈瘵。蘊智居仁。一試立述。善氣所凝。且昌其世。因迹推賢。請視斯製。

誥授光祿大夫二品頂戴升缺後加頭品頂戴署浙江按察使分巡金衢嚴道

郭公墓誌銘代

郭氏自唐汾陽忠武王孫嵩咸通中入閩。居福清之澤朗鄉。再遷遂籍侯官。至教諭階三公。族始大。教諭五子皆登科。其次曰柏蔭。最賢而貴。出嗣教諭之弟世厚公。以翰林歷官江蘇廣西湖北巡撫。署湖廣總督。國史有傳。中丞公子六。公次長。諱式昌。號穀齋。廉素通曉。早歲屬文。婉有辭。况十六入邑庠。逾年食廩餼。然即遠慕。勳效留意。牋牒既用。軍功得知府。始舉於鄉。再罷春官。誠乃宦浙。湘鄉蔣果敏公方以勳誠撫粵。檄公佐戎幕。濱海客民倡亂。既受創而強者負固不下。公單騎即賊中。撫慰。

乃投械爭出。款於軍前。果敏上其功。賜花翎。遂權肇慶府事。賞拔鄭公紹忠於罪籍中。後卒為名將。果敏求治急。所屬咸莫便其私。督府瑞文莊病之。公進規。果敏恆以官胡交驩為言。然果敏終以直去。文莊知公溫裕。常調和兩府間。遣客道意。留公自佐。公不可。戊辰歸浙。權温州府事。再權湖州。旋移台州。台州黃金滿者。盜俠也。椎埋攻剽。廢亂郡中。恆依山阻隘。恣為醜圖。官軍累起莫勝。浙中大震。而臺諫論列。至伍之黃巢。方臘。斥為雄渠。公單車至治。進台之父兄。叩以盜蹤所自。知客兵多為賊。詞急。檄趣移軍內屯。別募土著。使人自為守。復以嚴法繩蠹吏。蠲斥苛斂。與民休息。金滿奸狡。恆以官吏貪酷。狀扇其徒類。至是知無倖。遂歸誠於彭剛直公。剛直許之。偕浙撫飛章入告。公請諸剛直。令隸長江水師。剛直檄公往簡其眾。賊中知公至。液人獲飲公。左右疑有毒。肘公勿進。公若弗省者。盡之。賊大感動。遂受令。果出隸長江軍。台事始大定。甲申。丁中丞公憂去任。服闋到浙。歷權杭州。金華府事。癸巳。以大臣明保引。見奉。旨仍發原省。遇缺即補。並交軍機處存記。其冬題補台州府知府。甲午。海道北上。護理糧道。旋省。檄權處州。未至。道更湖州。丙申。復歸台州。於是公蒞湖三。蒞台再矣。台固盜藪。舍新刈無術。公獨靜鎮。無擾盜亦不作。台人稱曰郭佛。戊戌。復以疆臣薦晉道員。庚子。義和團起。衢州奸民亦煽動。既殺教士。職及羈弱。復劫

取縣官叢糗洞腹背戕其二子尸次外人大開將勒兵搗杭城是時東南方立互保之約劉忠誠公自金陵馳書問狀大吏始取為亂者刑鞠於府治然外人責首惡急衛人益潛煽不已大府謂公夙望移公為金衢嚴道鎮之公得檄親故咸止公公曰人臣舍難事弗任孰宜任其難者卒往諭士民令安堵釋其株連者懸金購魁率不旬日果得盜外人責言始息公前以籌餉功加二品頂戴中丞任公臚公政績入告得旨升缺後加頭品頂戴甲辰冬奏署按察使時公患脾洩甫愈歲暮冒風雪登程既受事理公臚接僚佐未嘗休息告公子侍郎曾忻等將解官卜宅吳閭顧卒以積勞成疾遂不起公平日靖默接人誠恕自出貴冑躋監司被服寒素晨起治官書罷即批點書史用以自娛樂服官四十餘年所至有聲顧厲約未嘗冒進晚歲始補郡中丞公無遺蓄公復量已審分不欲以財自累故身沒後囊篋蕭然無一語及於家事公生於道光十年五月初十日卒於光緒三十一年二月二十九日年七十有六聘周氏配陳氏誥封一品夫人側室蔣氏誥封恭人貤封夫人皆先公卒子七人曾忻庚辰翰林改主事直軍機處裁缺通政使署工部戶部禮部侍郎曾準壬辰翰林改江西泰和縣知縣調新建縣候選知府曾程乙丑進士內閣中書江蘇元和縣曾鈞長蘆運判曾法議敘鹽大使曾量曾轍俱庠生女六長適四川忠州

知州陳春濤次適庠生楊伊年。三適國學生何可齋。四適庠生林斯欽。五適舉人范
彥璋。六適京師大學堂肄生林斯高。孫十三人。則泌庠生補用知縣則灃。癸卯進士
選庶吉士。武英殿協修。則瀚。則洵。俱庠生。則涑。則濬。庠生。則范。則江。三品蔭生。則
濟。則澍。則濂。則沛。則浩。曾孫三人。可說。可誦。可訥。公子曾忻。將以十一月卒。未葬。公
於福州北關外龍腰山祖塋。來乞銘。公子和悌美令。聲善虛己。有大臣風。余昔掌禮
曹。嘗為同僚。而則灃又余癸卯禮闈所得士也。知公盛德行。且大盛其門。爰為銘曰。
尚書帥楚。實平楚政。清績貽後。門業斯盛。公抱純節。嗣起勳伐。厯將五州。用遏集姦。
天台隆崇。盜蕃其徒。窺擾越中。通我靈諫。牙兵偶賊。肥狼脂韃。公往蒞之。扼其襟要。
局鑰既啟。原火胡燬。名實大彰。世欽節臣。爰履升途。逾懷澄清。三衢變生。西旅見殊。
殺尹翻城。洞腹拔鬚。連帥雌懦。震局莫可。西鄰責言。適及憲坐。公奮武怒。立夷渠魁。
拔秀遂良。鏡服奸穢。越旬既清。帝命升擢。美効夙著。輿論交作。名子繼武。實帝
樞近。翎章墨綬。仲叔連軫。疑疑羣從。孫枝尤振。生榮死哀。忠概日彰。私曰。令家公則
國祥。既美既壯。以安以藏。我銘公宮。嗣續永康。

母弟秉耀權厝銘

亡弟秉耀甫週歲。先君客遊於臺。貲盡不能歸。一家九人。咸仰母孺人及長姊鍼黹。

以自給。一日再食。至不能舉。紆方九歲。向午自塾歸。母以四錢市餅飴。命食之。遽去。不言。全家之未舉火也。第時盤旋地上。見爐中沸瀉。問先大母曰。糜乎。兒饑也。大母泣。母孺人強笑呵之。而心愈悲。明年叔靜庵始得館。月歸三金。於是大父母及紆兄弟得不餓。又明年八月。先君自臺郵致二十金歸。月以為常。於是舉家乃盡得飽食。更十年。大父母及先君相繼逝。弟亦十餘歲矣。願體羸善病。喜作畫。為大龍湫觀瀑圖。氣勢甚盛。嘗見紆任氣不合於時。心憂之。私謀於母曰。阿兄嗜讀書。家業未立。兒當遠客求貲。以竟其志。紆微有所聞。泣止之。不可。越戊寅。靜庵叔自臺北以書招之。弟益踴躍。紆再止之。而弟卒行。行二十五日。即以書來告母曰。兒無苦。母善自養。兒舊榻毋勿移置。當時時坐卧之。如兒在家時也。紆得書。易其詞為母誦之。然靜夜持書。怔忡如有所失。亦不疑其有他故也。是年九月五日。果以疾卒於臺灣之滬。則年十九耳。紆即日奔其喪。至則叔亦病熱新愈。出道研授。紆曰。耀弟疾亟時。手強不能書。持此以授若也。嗚呼。紆不孝不友。竟以口腹累吾弟矣。自今以往。何以為吾母慰也。方弟沒時。紆次子未生。越禮以長子嗣。逾年喪歸。厝於玉尺山之麓。爰為之銘曰。孝者之不昌。其年也。生則何人知汝賢也。行將葬汝於先君之阡也。厝汝於是。冀以旦夕見吾前也。嗚呼。天也。

鄭氏女墓誌銘

女雪。字伯雪。林紓畏廬長女也。嫁鄭氏。婿名禮琛。邑庠生。翁子達。姑林氏。鄭故宦後女嫁時。翁姑已前卒。家於東城之鼇峯坊。明徐與公紅雨樓故址也。余每視女雪。女雪送余至堂階上。色惘惘。若將久別。余望見雪門宇。心忘忘。輒不可遏。初亦未省其非祥也。迨女雪病時。當人目見余啜泣。余始大恐。自是偃卧牀席不能起。二月女雪病少間。余遂來杭州。惴惴然恆日望其愈。越月家人以書抵高嘯桐。道雪死。嘯桐約余遊白堤。告余舟中。乃面南大哭不止。子婿禮琛省余杭州。告余將以庚子夏祔於鄭氏之阡。余念雪之孝。不能不誌其墓。雪天性惠孝。聰穎明達。世事年七八歲。隨祖母太宜人寢處。余夏夜撚紙沃膏。灼蚊火觸帷幔。幾大熾。以手撲熄之。雪微聞。知潛啟關視余。五指焦爛。泣以泥印塗余指。遲明。余入城。赴致用堂課。迨晚。雪戚戚遲余門外。不敢以焚指事語太宜人也。讀書絕慧。每遇針黹。輒背誦杜甫北征昌黎南山詩。琅琅可聽。乙未太宜人項癰大癰。膏液淋漓。女雪凡五十餘夜。弗敢就枕。手調藥。其母劉孺人執燭隨其後。雪梗聲佯笑。附藥於指。摩患處。絕輟。太宜人初不覺。越卒時。雪暈絕至六七次。自爾更侍其母。劉孺人疾經兩月。如太宜人病時。一夜焚香告天。以刀割臂和藥進。卒不效。劉孺人卒之明年。余仲子鈞又以療死女雪愈悲。肺病

遂劇。猶陽健以慰余。嗚呼。雪之心苦矣。雪以丙申七月嫁。己亥三月十九日卒。年二十六歲。其相鄭氏之美。余莫詳也。第聞其伯妣哭之至哀。余婿為事略千餘言。將視余。余屏弗視。余方戒家人無言女雪事。余垂老更家難。不欲屢悲以戕其生。今志墓遲六閱月始脫稿。雪當知余之傷心矣。墓在某村某山。銘曰。

嗟夫雪死也。吾哀嫁也。吾喜女。今有歸吾老矣。宅爾魂魄。永祔於鄭氏。

釣壩銘

嗚呼。此蓮塘林紆孺子釣墓也。紆五子。釣次仲。紆亡室劉孺人嫗而病肺。釣生弗碩。五歲僅扶牀立。迨長。肝風內煽。發時僵如死人。年十三。從余讀書龍潭。夜寢支體伸縮。時以手近吾乳。意似依其母。紆愈憐之。喜焉。第伯封禪儀記及漢書外戚傳。讀不已。丁酉二月。劉孺人卒。釣日惘惘。神氣若無所附麗。行步欹忽。倏止倏作。余譏劉孺人哀辭。令釣莊書之。五日莫就。以手拊腕告紆曰。釣心痛不可忍。不能竟書矣。方劉孺人未病時。紆應縣縣張韻舫太守聘赴荔城分校試卷。有某生懷百金過子。冀賞緣得首列。李惺庵方招余飲釣龍臺。釣出見。讓某生曰。吾自知人事。迨此。未見家君受此金也。丈高太守自得之。胡戚戚奔走如是。時郭懷臣孝廉與余同舍。聞釣言大驚。轉以賀我。嗚呼。釣竟以戊戌二月咯血死矣。年二十歲。紆屬客杭州。厝其棺某葬。

今且亂始葬之于荔支林祖塋之側銘曰

鈞汝從死母而樂耶吾其奈何吾哀而丁亂離鈞其奈何人生勞勞百年未多歿者良安吾其敢病天之苛

告王薇庵文

維年月日林紓崇酒於觴登肉於俎謹頓首頓首告於吾友薇庵先生之靈曰嗚呼余之交誼猶有餘人可以及君者余之哭君亦將少殺而不如是之悲也余有所言忌者諱其狂也余有所鬱伊而不平諍者謂余戾於時而憤其不得名也咽而不呻則昏然如醒於時必過君而鳴之君語余起君語盡而余喜以余之狂悖頑鈍君數語輒能感之則君之德量余又能測其所至耶嗚呼士當貧賤坎壈之日親戚之形神不接知交見而奔避於此有人扶之攜之雖僧也屠也吾猶侶之而况躬孝友之行負文章之名愛我以德接我以禮感我以情者耶憶戊寅之間君館余於家君別出館於史氏數日必歸歸必把余之手而談時雨盛屋穿數易其座滲隨及之君與余方縱談世務傾吐肝膈怡然有得而各忘其貧余自是益服君且悅君之良於處家歸告吾母未嘗不交相歎息也是年之秋余愛弟秉耀客死臺澎吾母慟哭幾絕余神志替亂不知所為明日君始得耗至則持余而泣不出一語蓋自知非言辭之

功可以遺余之悲也。而余亦知君有無窮之言。至此必不能得其要領而足以止余悲也。嗚呼痛哉。余喪吾弟之七年。始哭林衡甫。今年再哭吾師朱韋如先生。不三月而又哭君。骨肉之痛。師友之戚。十年之中。已歷其四矣。方君呻吟於牀第之間。聞余足音。已自起立。既以慰余之憂。又數趣子背誦其近作。微有所愜。則啞然而笑。數笑而氣不續。而君不恤也。嗚呼君意。余知之矣。蓋曰望余學業之進。而釋君望余無窮之憾也。世非骨肉之愛。有如是耶。且君有孤而不余託。君有隱衷而不余告。既死乃得諸嫂氏。述君之言曰。若勿怖余死。彼林某者。固能善處若子也。嗚呼。余何人哉。乃辱吾友見信至此耶。夫君子我徒。君即不言。余敢漠視。乃君不屬之余。而屬之夫人。屬夫人甚於屬余矣。君子十六。余子十二。次亦九歲。明日當令此三人相視。若弟兄。君子而才。惟君之德。君子不才。惟余之罪。余求不負初心而已。成敗非余所能料也。嗚呼哀哉。余哭而君不聞。余號而君不應。然余固願君不聞不應。得以自安其靈。不然。恐將因余之哭與號而增其悲懷也。尚享。

祭陳氏姊文

維年月日。同產弟紉及從弟秉箕。謹以時羞之奠。再拜頓首。敢昭告於陳氏大姊之靈。曰。嗚呼。母最念姊。姊目遂瞑。短髮顛聲。猶造爾靈。在昔喪弟。母咽弗呻。今復哭姊。

我心如醒人哭所親必遂其情。我防母聞。無敢縱聲。爾階爾堂。爾櫛爾巾。乍過未思。若有其人。思之忽號。萬刺叢生。嗚呼哀哉。我蒙而宴。姊次適長。以力佐母。二饋所仗。我餒而啼。姊泣莫仰。我晨起塾。姊送之門。沐櫛我髮。蔽緩我禪。惟姊是依。事姊猶尊。姊嫁卅年。五喪在殯。今亦喪姊。魂裂魄震。死果泯泯。吾亦何念。瀕危呼我。載相我面。冥冥萬年。慘慘一見。嗚呼哀哉。總惟振風。秋銓飲耀。生遂死安。於姊何平。顧瞻我母。日惟哀悼。相母勿悲。惟姊之孝。尚饗。

告周辛仲先生文

維光緒癸巳年二月五日。孝景先生周君既卒之二十一日。同社林某及某某。謹以時羞之饌薦。且泣而告之曰。嗚呼。遠吾而念吾。吾知君之思也。近吾而不吾訣。吾知君之悲而不質言也。君且死。不忍訣君朋友。以其言。以言之將。以滋朋友之悲也。嗚呼。吾諸人甯不知君之心。又甯能喻君之不忍。因是而不悲耶。憶光緒戊寅。吾始交君。甲申海上變起。主兵者諱敗而入告。君怒約余下狀陳懇。遮太保文襄公於馬前。退而顧余曰。不勝赴詔獄死耳。時主兵者勢盛。同輩咋舌。君目光如炬。縱談敗狀。未嘗有所顧忌。余偉君忠義。謂異日必且死大節。洎庚寅。君果構難於彰化城。二月至京師。與余述入賊諭降累死不屈事。甚悉。吾謂君之功且得獎。乃見構羣小。間關道。

路性命之不保其間不可容髮嗚呼邪說之害公。護謫之蔽明。甯自今日始耶。知道之可以自勝。知禍至不可以常理格。雖阨於小人無憾耳。吾獨怪乎太先生之盛德。君之慈惠。已有四男。撫棺而慟者曾無一焉。方庚寅報罷。與余同歸。長公子已前病。吾與高君嘯桐造視公子。君置藥鉢其前曰。昨兒病。吾周夕未睡耳。公子殤。吾復與嘯桐挾君過李次王家。童子數人。造余膝而語。吾察君不言。意甚索然。假他事麾去之。私計太先生之盛德。君之慈惠。必更當有子。而不意君卒以從子嗣也。嗚呼傷哉。吾始哭君於寢。退執孝子之手。觀其容。木然若追其所亡。慙然若無所自容。噉然而號。聲引而若嘶。心識其能哀矣。自今以往。君之門戶。其有託矣。獨君之朋友聚則輒悲。語君之不偶。則尤悲。明日得君之遺草而治之。循其聲。懷其人。恐其所以悲君者。無窮期也。尚享。

祭宗室壽伯弟太史文

維光緒庚子閏八月某日。吾友伯弟先生暨其弟仲弟殉節京師。後死友林紓率門生陳希彭以斗酒隻雞。為位哭先生於孤山林社中。並為文以祭之曰。肇造區夏。維我太祖。殲祉發祥。螽斯之羽。天潢十葉。及侍郎某。節超廉貞。邇漢李杜。紆及公門。歲在壬午。計偕禮公。梅花列廡。退而公子。期君純仁。器業昌醇。秉心忠肅。屬節為秋。

照人如春一語見契。遂誓生死。柴車均憑同載過市。四月昆明。蒲芽被水。穹橋虹低。
轟天百齒。萬柳界堤。我思君侯。炙羊海濱。就屠乞紙。酒為新詞。據案互視。六年三接。
吾師已矣。慟哭聖廬。弔君兄弟。哀以義深。終食累唏。君抱遺書。將我校理。我懷亡師。
乃圖墓祀。弔車十七。自南泡始。塘水晴碧。東花礙履。墳草初宿。愴喟成禮。吾羽七銖。
見君輟喜。戊戌之春。君登翰林。我聞君捷。如醉夙心。同舍高生。聯軫相尋。圖荊示意。
花開秋深。鵲尾之雲。忽湊東海。腥流關里。孔林見驂。公車待詔。萬士譁怪。上書踵接。
詣臺若馬。余及高生。槐陰閉房。高生具草。其詞洋洋。首請罪己。屯兵儲糧。先求內治。
再圖外攘。書成視君。君自毀橐。署名吾後。呼車上道。臺門靜深。壞堂生草。老隸垢面。
猶怪如獠。南風起塵。黃微穹昊。鞠躬候門。吹埴盈抱。大夫視狀。腑焦騰燥。斥還所司。
詞語顛倒。吾欲抗辯。君不謂然。百年積猥。蔽忠塞賢。激水非清。善刀則全。長安春陰。
柳棉僊僊。迴車敘別。遂辭幽燕。天佑 聖清。相我 皇帝。聖怒如霆。排幽攬髯。雄
圖遏遠。莫敢狂狴。君官太史。召對南齋。持節海東。將窮歐西。甘露變生。內討訓注。護
聲結雷。忠血吹雨。天下鉤黨。儒冠兇懼。覆巢破卵。禍且及女。撲面北風。日夕待起。兩
牋告存。備見情懷。洪流獨撐。弗失故步。養癰三年。盜窟京畿。桃邊市怨。授敵以資。胡
星墜燕。喋血伏尸。猶聽犯闕。鬼雨飛霏。獄急鼃錯。謫行袁絲。不面君顏。隱悲君悲。維

時祭宗。鬼遣明月。羣妄謾天。公道夷沒。十六宅門。膏斧齒鉞。慘慘蛇雲。名帥再蹶。金闕烟塵。車駕播越。君念原廟。詎忍獨活。卽抄驟傳。果君殉節。驚咽欲啞。駭踵成蹙。冀君未死。幻想遶潛。念君既死。腸胃傾軋。君不可死。死曰棟折。君即不死。詎曰非哲。嗚呼哀哉。燕雲飛飛。下為君廬。梧桐兩三。間以棕櫚。巷水成湫。當門礙車。我常造君。黃梁新蔬。間出饅饅。佐我朝餽。滕花將糲。苞飴弗濡。被酒論事。國責為虞。出話非祥。乃終踐歟。嗚呼哀哉。排門悲風。落葉紛紜。弟兄叢哭。憂心如醺。閉戶調藥。旁非朱雲。弟殉妹從。天地愁昏。一門五忠。就圓成墳。嗚呼哀哉。君子殉國。朋友何愴。憫君弱息。甫離襁褓。天佑忠孝。必翼以長。吾哀肱肱。未敢慨慷。祭君林社。孤山之上。忠魄相愛。必見靈爽。柳焦欲髡。湖渴成澆。萬瘡積胸。百哭敗喉。至哀莫罄。伏惟尚饗。

祭故太常袁秋先生文

維光緒辛丑月日。誥封資政大夫原任太常寺卿桐廬袁公忠觀歸自都門。後學林紓合生徒二十人。以清酌時羞之饌。昭告於公之靈曰。嗚呼。雲火孕劫。憑雨萬軸。怖刀入藕。前僵後伏。祆黨贅猛。吐霓翳日。狂山擗胸。捫天如漆。脩龍口燎。苞輝莫出。萬虺羅首。饒吻翕闐。鳩類集族。凶力齊一。百聾一昭。幽主明客。我公餘憚。知事弗臧。智局既廢。行行對揚。天聽垂移。狡衆復昌。肆其醜圖。窟此逋穢。賣望舞華。遁外廛內。

錦股帕首。繞闕嗷。吠。琢。斯。幾。輔。膏。節。流。離。少。康。逐。犬。澆。幾。罹。之。嚴。符。切。勒。養。癰。弗。治。劍。龍。夜。叫。堂。升。蛇。龜。鳳。凰。開。戟。翻。為。賊。麾。公。愈。離。蠶。夜。白。其。鬚。三。疏。畢。議。婁。直。厥。詞。謂。此。凶。囊。實。託。樞。近。妖。夫。是。滅。皇。綱。斯。紊。桃。園。非。策。蓄。盜。難。訓。勿。務。檻。塞。乃。釋。邊。忿。蜂。蜚。斧。螭。翳。天。大。宣。謂。公。懷。讓。叫。呶。狂。奔。劾。繫。侵。辱。亂。阱。不。門。獄。獄。尚。書。力。排。天。閭。侃。侃。侍。郎。載。懷。國。恩。大。忤。權。相。趣。赴。詔。獄。三。忠。同。極。獄。火。縮。綠。素。秋。勁。風。市。塵。雲。霧。宣。詔。論。決。家。眾。奔。號。談。笑。出。獄。神。儀。弗。撓。珠。璧。蔭。映。榮。車。宮。袍。公。之。死。忠。天。顏。不。怕。既。盡。蠱。錯。旋。修。袁。絳。雷。霆。乍。過。雨。露。遂。沐。隆。寒。甫。弛。炎。景。載。燠。冤。酷。大。伸。海。內。咸。服。嗚。呼。哀。哉。公。靈。有。知。必。念。關。中。燕。羽。空。城。清。渭。日。東。春。老。行。殿。花。淒。故。宮。九。譯。呶。嗚。責。言。無。窮。公。為。鬼。雄。必。相。聖。躬。逼。絕。敵。氛。勿。迫。臨。潼。嗚。呼。哀。哉。資。忠。履。義。至。公。而。極。時。屯。內。難。我。思。輒。泣。匪。惟。泣。公。亦。以。憾。賊。彼。人。鄙。我。目。我。影。國。公。不。我。留。我。國。誰。翼。公。不。我。起。我。懷。誰。直。積。淚。腐。臆。嘶。極。而。息。嗚。呼。哀。哉。公。念。吾。皇。天。下。念。公。款。款。顙。官。拊。琴。吹。簫。肉。梅。為。樂。其。樂。融融。嗚。呼。哀。哉。公。靈。有。知。必。念。關。中。尚。饗。

王楨臣先生哀辭

嗚呼。我楨臣王先生以宦死大甯矣。先生以今歲之春發京師。比余至京師。先生已去道里遼遠。經月不得一書。越四月余歸。而先生之赴至矣。嗚呼。善人之不佑於天。

其信然耶。或天惡薄俗。乃戕為善之人。以益為不善者之疾耶。果爾。天又何樂以粹學純行畀我先生。乃既畀之。而復頓折凌挫之。以為快耶。若夫為不善者之死。亦云積矣。羣以為可死。則亦莫過而數焉。而獨於先生之死。怵目惕心。太息怨憤。則亦可觀人心矣。吾聞大甯治萬山之中。胥隸數人。雜耕作以赴公事。縣庭積草經尺。堂宇荒墟。大風覆壩。狼時入焉。食無肉。出無輿也。先生素患肉疾。到官以勞自矢。備一僮及一門生。不以妻子自隨。吾度其病革。必甚念其妻若子也。妻子不可得見。又必甚念其平日所暱之朋友。念朋友則必及余。夫道途萬里。一棺未歸。而朋友莫盡其職。則不肖如余者。其何念焉。然余弗利公之死。私引以為悲者。旁人亦烏從而知之。先生平時處我不以恆人。有過則不擇地而怒且詈。及聞余善也。未嘗有褒詞。察其色。若甚豫焉。則知余之獲當於先生也。余制行詭僻。積怒權貴。避黨弗趨。宿憾次骨。此皆先生生時所斥為狂佻者也。嗚呼。明哲保身。先生常以為言。第余無先生之粹學純行。而成其為狂佻。先生復中道棄我而去。卒不得踵先生之粹學純行。是則先生之死。猶有憾焉。余今者杜門江湖。讀書種樹。懺除時名。將以終踐先生之言。先生其許我乎。生前事實。將別具為傳。因先製斯詞。以舒吾哀云。

望汾流之浩渺兮。棲精靈於何鄉。等古人之羈旅兮。有狄道與龍場。魂冥冥而弗怡。

今。靡天屬之在旁。殊年命之弗辰。今乃五角而六張。秋蘭萎兮遺芳。神劍折兮收銑。招魂兮大荒。縹馬兮晉陽。歸來歸來兮。馨椒糝。

李佛客員外哀辭

佛客友余以癸未。別余以甲午。今年乙未六月。余哭佛客矣。前後十三年中。月集於佛客之辛夷樓。恆四五。佛客離業既敗。乃肆力於填詞。旋以治生為憂。復舍填詞而圖官。又不成。則去而之江南。客南皮尚書幕中。周歷世事久。乃於朋友益篤。每與余書。恆言至江南。窮閉一室。日治官書。不更求交。雖選交於足下。亦未有以相過也。余方以為佛客中歲識道理。明去取之分。行可以為官。為官必且以勤顯。初不意其竟摧挫以死也。佛客有母在江右。相望一水。不能即之為訣。夫人及其子女數人。痛佛客之死。瀕於絕粒者數矣。身後僅有書數千卷。藏其友高嘯桐家。又書畫千餘軸。度之別業。佛客所有。止於是矣。而母之所以養。與儲侍以待其妻若子者。佛客至死不知所為謀也。向使佛客勿以官自憂。據其先世遺書。讀之終身。法當不至於窮餒。矧有子甚才。中乙科。苟知止。當有殊樂。奈何輕去鄉土。而就死於江南也。吾聞江南積官倍於他處。佛客雖以才進。必無加於閭閻諂佞者。獨得美仕。吾故知佛客雖居幕中。其心實未嘗以江南為樂也。均之為樂。則輕去其家為失矣。佛客生有至行。嘗到

股以療其親。今太夫人就養江右。即未聞變。必且心動。吾聞奮曾太守公退至不敢獨面太夫人。豈迹兆已見。患致詰耶。抑愉不藏悲。防其有觸。即發耶。嗚呼。人子之死。至使家人不忍聞其親。平日內行。甯有不足信耶。此其至可哀者耳。爰為辭曰。嗚呼。斯人之數奇。夫非李氏之微耶。果豐建而當輔。其先胡雄以貲耶。父蹈而子振。瘠家而腴書。甯云哀耶。重獲於天而終瀕於危耶。孝者之慳其年。將使閭望者益無窮之思耶。鍾山蒼蒼。明秋暉耶。吳柳被江。搖風漪耶。吾將禮魂於彼山之巔。彼水之湄耶。嗚呼。斯人不亡。余奚悲耶。

亡室劉孺人哀辭

孺人劉氏名瓊。余字之曰孟質。歸余二十九年。光緒丁酉二月四日巳時卒。年四十有六歲。嗚呼。余與孺人齊年。自十九迄於念八歲十稔中。余危病。常病十數。得至今存者。微孺人力。余久即於墟墓矣。尚及殯汝。且續續而哭耶。余初家橫山。小屋三楹。前居母妹及弟。余處中。最後奉我大母陳太宜人。余病時。積夕亡睡。孺人方孕。女雪。羸若不能自勝其軀。余憐之。病中至無敢微呻。偶呻。孺人輒問。預置茗具。熬火以進。殘月向盡。雁聲自遠而近。余戲孺人鬼嘯乎。去爾無多日矣。孺人悽然莫應。更七日。余幸能步。孺人夜四鼓即起。作糜食余。久之。余乃應時。而飢孺人已秉燭舉

按候牀下。不差晷刻。余病起益困。親故不相過問。遂恣肆為詩歌。鄉人益目為狂生。不敢近時。余弟新喪。母太宜人悲戚萬狀。孺人患余貧薄莫養。私請於外舅修梅先生。助余膏伙。竟舉業。明年得館。又明年補弟子員。壬午領鄉薦。遂由橫山遷瓊河。再遷蒼霞洲上。春秋佳日。風和景明。余妹率其諸甥來觀吾母。家人大集。孺人自製豆粥。遍餉之。夜靜人散。篝火在壁。太宜人未寢。余與孺人及女雪侍坐。余舉村市瑣語。及鄉里近事。以悅太宜人。孺人輒以為妄。余私顧孺人善識之。過此不更有是樂矣。嗚呼。尋常一語。遂定今日之讖耶。吾母病時。孺人已數數而喘。余夜起禱越王山。值雨。孺人滅燭坐候。豫以水漬戶樞。令勿憂。以驚太宜人。乃私啟納予。去溼衣。進粥。步履輕蹠。太宜人卧複室。不能聞也。太宜人自病及喪。凡百餘日。孺人均不甚睡。兩申嫁女雪。其冬葬太宜人。孺人因而大困。飲食至不能一合。丁酉正月移新居。孺人病革。女雪露香告天。以刀割臂。和藥以進。越三日。孺人卒。至死不聞女雪之事也。孺人未死之二日。余友鄭生仲良以西人映相法留其影。卒日影成。仲子如鈞捧而大號。女雪及余冢媳陳氏見之皆暈。迨入殮。陳與雪互暈至七八次。既殮。棄所遺衣。均縷裂見絮。數襲皆然。生平未嘗衣帛衣享事。夏月食瓜。見子婦至。立授之。辭則怒發。性直毅。論事每與余左。往往至失歡。嗚呼。早知及此。恨其不讓吾孺人也。余年且五

十。遺落世事。將杜門讀書。資孺人以待老。乃孺人竟不終事余。天也。因為辭以哀之。
曰
我匪。蠶。蠶。新衣食兮。子通弗御。死婦職兮。念子舊恩。殫子力兮。幽懷感恩。無終極兮。
嗟哉。嗟哉。吾孟質兮。